

VE

Iesu Keliso yana ve Ioni 'waineye.

Tutuyanina Ioni i miamia Imula Fatimo, vanuga 'eba yogona 'waineye, buki de'e i kilumi. Iesu i wafa i laka abame, bani'odi malamala 35 i 'a'avana, mulieta de'e bukinina Ioni i kilumi. Buki de'e 'ana kiluma 'ana tutuye, Iesu 'ana tovetumaganavo veviga bwaikidi i veveluagadi Loma gabemani 'waidiega, siwe buki de'e 'wainega tovetumagananidi 'aivaita i veluagai, bega ma yadi venuafoufa'ala i vetoketoke.

Ioni, Iesu tauniotogina i 'iseni 'wa da vo i da 'enoneganega, 'enoneganeganina 'wainega Iesu yana vona tovetumaganavo 'aila'a 7 faifaidi i nogaidi, mulieta i kilumidi. Wata nani tulina tulina 'awaie i na souyediga i sivemagesedi 'waineye, bega Ioni i lu'ivoneyedi 'waideye bukinina 'wainega. Naninidi Iesu i ve Ioni 'waineye awatabai 'waidiega, bega 'adi 'aseta 'wa da vo ta da 'isa-ganuganunuyedi.

We'e buki de'e 'ana nuanua bwaikina mageseye, Yaubada yana vetoketoke Seitani wata yana 'aila'a yaiaina 'waidie faifaina. I na vetoketokega Keliso 'wainega, wata tomia fwayafwaya taunidi i tauyediga Seitani 'waineye i na leodi. I na leodi i na 'a'avana, abama wata fwayafwaya 'ivaudi i na 'idewadi, mulieta Yaubada yana 'Aila'a ma yadi sosoana i na mia-vagata Yaubada wata Iesu Keliso taiadi. Buki de'e 'ana 'idi side bani'odi.

Buki lamuna wata vekaiwa tovetumaganavo 'waidie. 1:1-8
Keliso i souyeni Ioni 'waineye 1:9-20
Keliso yana vona tovetumagana 'aila'a 7 'waidie. 2:1-3:22
Buki nunumina wata 'ana yogoyogona 7. 4:1-8:1
Anelose 7 yadi evulega 7 i yuvedi. 8:2-11:19
Tomotoga 'adi 'aitonu, 'aisaya kasikasisidi bani'odi. 12:1-13:18
'Ifwaidi ve. 14:1-15:8
Nani sakoiotogidi ma 'aivoedi 7. 16:1-21
Yaubada 'atamana Babiloni, tomotoga 'aisaya kasikasisidi bani'odi,
wata Seitani i leodi. 17:1-20:10
Tomotoga matatabudi yadi vonayavuga Yaubada mataneye. 20:11-15

Abama, fwayafwaya wata Ielusalema 'adi 'ive'ivau. 21:1–22:5
Iesu yana vila-vaitugana faifaina. 22:6-21

1 ¹Vonanidi buki de'e nageneye Yaubada yana 'anivelena Iesu Keliso 'waineye bega ava'ai sai'afoga i na souyediga, i sivemagesedi Yaubada yana tofolovavo 'waideye. Keliso yana anelose abamega i vetunei yau Ioni yana tofolova 'waikuye bega naninidi i veku. ²Nani matatabuna a 'isediga a vonevonemi. De'e a lulu'ivonaga valanina i mai Yaubada 'wainega wata vonanidi tonovidi Iesu Keliso i lu'ivoneyedi 'waikuye. ³Fai naninidi sai'afoga i na souyedi, egavo de'e Yaubada yana lu'ivonanina i na lu'iawawaiga i na sosoana, we'e egavo vonanidi i na nogaidi i na vematayakeyakediga wata ma yadi sosoana.

Ioni yana vona nuakalikali tovetumagana 'waidie.

⁴⁻⁶Yau Ioni a vekaiwa 'omi tovetumagana 'wa miamiani 'atamana 7 'waidie, 'awalawa Eisia nageneye. Nuanuaku Yaubada, 'Anu'anununa wata Iesu Keliso, ma yadi nuakalikali i na vevesauluva 'atumaina 'waimie wata nuanua bikana mia 'atumaina taiadi i na velevelemi. Yaubadanina miamia-vagaina, 'asiau i miamia, basenadi i miamia wata boladiotoga i na miamia. Yaubada 'Anu'anununa 7 i miamiani yana 'eba miabui 'ai'aiwabuna mataneye, we'e Iesu Keliso taunina tolu'ivona tonovina ma 'ana vetumagana wata Yaubada Natuna, kumanina nagami i tovoi wafayega, toveimea fwayefwayeye taunina 'adi Toveimea bwaikaotogina.

Iesu Keliso ta na subisubiai fai i nuakalikali, yana wafa 'wainega i yavuda yada sakona 'waidiega, wata i silakaida bega yana 'Eba Veimea nageneye ta miamia wata ta vevetofolova yana Yaubada 'alo Tamana faifaina, 'asa'aiana 'ida yana tovelomu. Mogitana Iesu Keliso ta na subisubiai fai taunina magemagetana wata toketokeotogina, kebu i na 'a'avaga i na mia-vagata. Vona mogitana, yaku nuanua bani'odi.

^{7b}Wa 'isanawe sino waowa 'wainega i mimai. Tomotoga matatabudi i na 'iseni, 'ana to'ailovena taiadi. 'Awalawa 'aitamogana 'aitamogana 'ana tomia i na 'iseni i na mimai, taunidi faifaidi i na vemogai.

Ava'ai a voneyeniga, vona mogitana yaku nuanua bani'odi.

⁸Yaubada 'ada Toveimea toketokeotogina, 'asiau i miamia basenadi i miamia wata boladiotoga i na miamia. I vonaga i vo, Yau kumaniku lamukwaikwaituna wata kaluna, kebu 'aku 'eba velamuga wata kebu 'aku 'eba ve'a'avaga.”

Keliso i souyeni Ioni 'waineye.

⁹Yau tatami Ioni, ma fuedeye vita ta veveluagadi Iesu faifaina, fueda yana 'Eba Veimea nageneye ta miamiani, wata yana 'aivaita 'wainega ta

^a 1:4-6 Ve 4:5, 17:14; Kol 1:17-18; 1 Ion 1:7; 1 Fit 2:9; Ve 20:6 ^b 1:7 Mad 24:30; Ion 19:34,37; Fol 1:11

totokemaigeda. Yaubada yana Vona a lulu'ageyeni wata Iesu faifaina a lulu'ivona begaidi i 'live'aviniku i mieku imule yadi vanuga 'eba yogona 'waineye 'ana wagava Fatimo. ¹⁰Tafaloloye, 'aiatanina 'Auvea yana 'Aiata, 'waineye 'Anu'anununa mogitana i ageku begaidi tamu bona mulikuye a nogai bani'odi evulega butu'aina bwaikina. ¹¹Bonananina i voneku i vo, Ava'ai 'u na 'iseniga 'u na kiluma i na nago tovetumagana 'adi 'aila'avo i miamiani 'atamana 7 'waidie i na 'iseni. 'Atamananidi side 'adi wagava. Efeso, Simena, Feligamo, Taiatala, Sadisi, Filadofia, Lodisia.”

¹²A sivilaku a na 'iseni aitoi kumanaga i vonavona, nika a 'iseni mageta 'adi 'eba yato golida matatabuna 7. ¹³°Kamwadie tamu tomogo a 'iseni 'ana 'isa'isa kumanina i vetomotogaotoga, 'ana talauma manamanawena i obu 'ageneye i le'wa, we'e bulava golida 'afauneamo. ¹⁴°Nava'auna 'ana lau'avu i kumeta bani'odi labia fwa'ena 'alo bunebune founa, matana 'aninamanamalidi bani'odi 'ai-'ala'alata. ¹⁵'Agena wata 'aninamanamalidi bani'odi tamu kainumu i luyauyauta 'ai-'ala'alata nageneye, bonana 'ana nogaya bani'odi kuvakuvala butu'aina. ¹⁶°'Ana 'atagie 'ubwana 7 we'e 'awanyeye kefata kainumu ma vi'avi'aina nigonigona. Maigina mataududulina 'wa da vo inala i da vulaoga.

¹⁷Tutuyanina a 'iseni a be'u 'ageneye 'wa da vo a da wafa. 'Ana 'atagi i yatoi tomogokuye i voneku i vo, Kebu 'u na kolologa. Yau 'eba velamu wata 'eba ve'a'ava. ¹⁸Yau kumaniku tomia-vagata. Basenadi a wafa siwe a yawasa, tutuya matatabuna kebu a na 'a'avaga a na mia-vagata. Wafa wata wafawafadi yadi 'eba mia, yau 'adi Toveimea.

¹⁹Faifainanina nuanuaku naninidi 'u 'ise'isediga faifaidi 'u na kiluma. Naninidi 'akonadi i souyediga wata naninidi 'awaie i na souyedi. ²⁰'Ubwananidi 7 'aku 'atagie, wata mageta 'adi 'eba yato golida 7 'adi nuanua givagivadi. 'Adi nuanua side bani'odi. 'Ubwananidi 7 taunidi Yaubada yana anelose 7, tovetumaganavo i miamiani 'atamana 7 'waidie 'adi to'isave'avina, we'e mageta 'adi 'eba yatonidi 7 taunidi tovetumaganavonidi 'adi 'aila'a 7.”

Keliso yana vona me Efeso faifaidi.

2 ¹Keliso i voneku i vo, Nuanuaku 'u na kiluma i na nago 'atamana Efeso, Yaubada yana anelose bei i miamiaga 'waineye, kumanina tovetumaganavo i 'i'isave'avinidi. 'U na kilumaga side bani'odi 'u na voneyedi 'u na vo,

Kumanina 'ana 'atagie 'ubwana 7, wata mageta 'adi 'eba yato golida 7, 'waidiamo i nunago, yana vona. ²°'I vo, Naninidi 'wa 'idewadiga 'akonadi a 'asetadi. Folova vitadi 'waidie yami dumwebika 'akonadi a 'iseni wata

° 1:13-15 Dan 7:13-14, 10:6 ° 1:14-15 Ve 2:18 ° 1:16 Ibu 4:12; Ve 19:15,21
f 2:2 1 Ion 4:1; 2 Ion 1:7-11

yami tokemaiga. A 'asetai kebu nuanuami tosakona taiadi 'wa na miamia wata tomotoganidi igodi i vo, 'Ima Iesu yana tomata'aulelevo," siwe 'wa sitonovidi 'wa 'asetadi i vevekali. ³Faifaiku vita 'wa veluagadiga siwe 'wa tokemaigemi kebu 'wa da baila.

⁴Naninidi 'wa 'idewadiga 'atumaidi, siwe tamu nani faifaina a na awavesakoyemi. Basenadi 'wa nuakalikalieku bwaikina, we'e tutuya de'e kebu. ⁵Yami nuakalikalinina nagami, 'wa na nuanuani bega 'wa na 'asetai ava'aiega 'wa be'u. Yami sakona 'wa na vedumwe'ubu'ubusedi, naninidi nagami 'wa 'idewadiga wata 'wa na 'i'idewadi. 'Ai'edi yami sakonanidi kebu 'wa na vedumwe'ubu'ubusediga, a na wai yami mageta 'ana 'eba yato a na elomi. ⁶We'e tamu nani faifaina a sososona, fai me Nikolaiti yadi sauluva sakoidi 'wa vedumwe'ai'aiedi yau wata bani'odi a vedumwe'ai'aiedi.

⁷Vona de'e 'wa nogaiga, nuami i na 'ivina nika 'wa na 'asetai ava'ai 'Anu'anunu 'Atumaina i vonevoneyeni tovetumaganavo 'aila'a tulina tulina 'waimie.

Egavo i na vetoketokega faifaiku, welavi i tovtovoi Faladaisi, a na tauyedi vuagina i na 'ani. Faladaisi Yaubada yana 'eba mia 'atumaina wata miamia-vagaina wata sosoana-vagata, we'e welavinina 'wainega mia 'atumaina wata miamia-vagaina i na veluagai.

'Asa'aiana bani'odi."

Keliso yana vona me Simena faifaidi.

⁸Wata Keliso i voneku i vo, Nuanuaku 'u na kiluma i na nago 'atamana Simena, Yaubada yana anelose bei i miamiaga 'waineye, kumanina tovetumaganavo i 'i'save'avinidi. 'U na kilumaga side bani'odi 'u na voneyedi 'u na vo,

Kumanina 'eba velamu wata 'eba ve'a'ava, i wafa wata i yawasa-vaitugana, yana vona. ⁹I vo, 'Ami vita a 'asetadi, 'wa vewekowekomaga siwe 'ai'aiwabu 'waimie Yaubada mataneye. Me Diu 'ifwaidi tutuya fuedi i awavesakoyemi, kumanidiavo igodi i vo, 'Ima Yaubada yana tomotoga," siwe yadi sauluva sakoidi 'waidiega ta 'asetadi taunidi kebu Diu mogitana, taunidi Seitani yana 'aila'a. ¹⁰Vita sai'afoga 'wa na veluagadi faifaiku siwe kebu 'wa na kolologa. A na vonemi. Seitani yana veimea 'wainega 'ifwaimi i na yatomi vanuga 'eba yogona 'waineye, bei yami vetumagana i na silubudi 'aiata ¹⁰^k nagedie. Nuanuaku ma yami vetumagana 'wa na tovoi fa'alina, bega 'ai'edi 'aku gaviavo nuanuadi i na luvewafami, 'wa na vetumaganekumo, kebu 'wa na baileku. 'Ai'edi kebu 'wa na bailekuga, mia 'atumaina wata miamia-vagaina a na velemini, yami tokemaiga 'ana tutula.

§ 2:5 Ve 3:3 ^h 2:7 Ve 22:1-2,14 ⁱ 2:9 2 Kol 11:13-15 ^j 2:10 2 Tim 4:8; Iem 1:12; 1 Fit 3:14; Luk 22:31-32 ^k 2:10 Tamu 'ana 'asetai, kebu tutuya manamanawenaga.

¹¹ Vona de'e 'wa nogaiga, nuami i na 'ivina nika 'wa na 'asetai ava'ai 'Anu'anunu 'Atumaina i vonevoneyeni tovetumaganavo 'aila'a tulina tulina 'waimie.

Egavo i na vetoketokega faifaiku kebu i na wafa-vagata. Kebu tamu sai'afō vita i na veluagai tosakona yadi wafa 'ana veluga 'waineye. 'Asa'iana bani'odi."

Keliso yana vona me Feligamo faifaidi.

¹² Wata Keliso i voneku i vo, Nuanuaku 'u na kiluma i na nago 'atamana Feligamo, Yaubada yana anelose bei i miamiaga 'waineye, kumanina tovetumaganavo i 'i'isave'avinidi. 'U na kilumaga side bani'odi 'u na voneyedi 'u na vo,

Kumanina 'awaneye kefata kainumu nigona ma vi'avi'aina, yana vona. ¹³ I vo, Bei 'wa miamianiga a 'asetai, we'e Seitani yana 'eba veimea fai tomotoga fueidi taunidi i tauyedi 'waineye. We'e 'omi yaku nuanua 'wa 'i'idewadi, yami vetumagana 'waikuye kebu i da mwēa. Seitani yana 'eba veimeanina 'waineye, bei yaku tolu'ivona Anitifasi i tokemaiga faifaiku i luvewafai. 'Wa 'iseni siwe kebu 'wa da bailekuga.

¹⁴ Mogitana 'wa tokemaigemi faifaiku, siwe nani 'ifwaidi faifaidi a na awavesakoyemi. Tomotoga 'ifwaidi taiadi 'wa miamiani Belami yana ve sakona faifaina i vevetutuyamedi. Basenadiotoga tamu toveimea bwaikina 'ana wagava Belaki nuanuana me Isileli i na leodi begaidi Belaminina, tamu 'eda Belaki i veni bani'odi i na munegidi. I vo, 'Ai'edi me Isileli i na sakona Yaubada mataneye kebu i na 'ivaisedi vetalaga 'waineye. Nuadi 'u na 'ewadi bega 'aisayanidi mali tomotoga i velomuyediga yaubada-vekavekali 'waidie i na 'ani'anidi wata i na veve'avula-'avo'avovo, 'amu fata 'u na vetoketoke 'waidie." Fai me Isileli i sakona bani'odi, Yaubada kebu i da 'ivaisedi vetalaga 'waineye, Belaki ma 'ana 'aila'avo i vetoketoke me Isileli i leodi. ¹⁵ Wata bani'odi tomotoga 'ifwaidi taiadi 'wa miamiani me Nikolaiti yadi ve sakoidi i vevetutuyamedi. ¹⁶ Saulvanidi yau kebu nuanuaku, begaidi yami sakona 'wa na vedumwe'ubu'ubusedi. 'Ai'edi kebu, sai'afoga a na wai tosakonanidi a na veimeyedi yaku toketokena 'waidiega, 'wa da vo taiadi 'a na vetalaga kefatanina 'awakuye 'wainega.

¹⁷ Vona de'e 'wa nogaiga, nuami i na 'ivina nika 'wa na 'asetai ava'ai 'Anu'anunu 'Atumaina i vonevoneyeni tovetumaganavo 'aila'a tulina tulina 'waimie.

Egavo i na vetoketoke faifaiku, 'ani'ani givagivana abamega a na veledi i na 'ani, 'ana wagava Mana. Wata kileu 'avu'avuna 'aitamogana

¹ 2:11 Ve 20:14, 21:8 ^m 2:12 Ibu 4:12 ⁿ 2:14 Num 25:1-9, 31:16 ^o 2:16 Ve 19:15, 22:12
^p 2:17 Ve 3:12

'aitamogana a na veledi, kileunidi 'waidie wagava 'ivaudi i kilumidi, siwe kebu tamu aitoi i da 'asetai, aitoi kumanina 'ana 'anivelena 'aisena i 'asetai.

'Asa'aiana bani'odi.”

Keliso yana vona me Taiatala faifaidi.

¹⁸ ¶Wata Keliso i voneku i vo, Nuanuaku 'u na kiluma i na nago 'atamana Taiatala, Yaubada yana anelose bei i miamiaga 'waineye, kumanina tovetumaganavo i 'i'save'avinidi. 'U na kilumaga side bani'odi 'u na voneyedi 'u na vo,

Yaubada Natuna, kumanina matana 'aninamanamalidi bani'odi 'ai-'ala'alata we'e 'agena 'aninamanamalidi bani'odi tamu kainumu yadayadalina, yana vona. ¹⁹I vo, Naninidi 'wa 'i'idewadiga 'akonadi a 'asetadi. Yami folova, yami nuakalikali a 'asetadi wata ma yami vetumagana 'wa vevetoketoke faifaiku. Basenadi sai'afo, 'asiau 'akonadi i vevebwaika.

²⁰Naninidi 'wa 'idewadiga 'atumaidi, siwe tamu nani faifaina a na awavesakoyemi. Vavinenina 'ana wagava Iesibeli, taunina tosakona igodi i vo, Yau Yaubada yana tolu'ivona,” 'wa tauyeni yana ve 'wainega yaku tofolovavo i vevekaliedi i veve'avula-'avo'avovo. Wata yana vekalinina 'wainega, 'aisayanidi mali tomotoga i velomuyediga yaubada-vekavekali 'waidie i 'ani'anidi, yadi nuanua i vo 'ako, 'Atumaina Yaubada mataneye.” ²¹ Tutuya manamanawena a lukamata, nuanuaku Iesibeli i da nuavilai, siwe kebu nuanuana yana sauluva sakoidi i na baileidi. ²²Bega a na taweni 'ivie bei i na veveviga bwaikina, we'e enavo taiadi i veve'avulaga 'ai'edi kebu i na nuaviladi yadi sauluvanidi sakoidi 'waidiega, ma fue die vita a na veledi i na toke i na veviga. ²³Tomotoganidi yana ve sakoidi nuanuadi, taunidi bani'odi natunavo wata a na nikedi i na wafa. Tovetumaganavo matatabudi i miamiani 'atamana tulina tulina 'waidie valana i na nogai i na nuani Yau kumaniku tomotoga yadi nuanua wata naninidi nuanuadi, a 'asetai'avadi. 'Aitamogana 'aitamogana tutula a na vele mi, yami sauluva 'ana 'isa'isa bani'odi.

²⁴⁻²⁵ We'e 'ifwaimi 'wa miamiani Taiatala 'waineye a na vonemi fai yadi ve sakoidi kebu nuanuami wata ve-vekavekalinidi igodi i goleni nuanua givagivana, siwe mogitana Seitani 'wainega, 'wa baila. Kebu tamu wata vita a na vele mi siwe nuanuaku ve wata sauluva 'atumaidi 'waimie i 'eno'enoviga, 'waidie 'wa na tovoi fa'alina, i na nagoga tutuyanina a na vilaku.

²⁶⁻²⁷ ¶Egavo i na vetoketoke, yaku nuanua i na 'i'idewadiga i na nagoga 'eba ve'a'ava 'waineye veimea a na veledi. Veimeanina basenadi

a 'ewai Tamaku 'wainega bega a na tauyedi 'awalawa 'aitamogana 'aitamogana 'adi tomia i na veveimeyedi. Yadi veimeanina toketokena, bani'odi fulumai kainumu nau i na nikei i na 'anivivia. ²⁸Wata tovetumaganavonidi a na veledi Kumauloku magetana bwaikina.

²⁹Vona de'e 'wa nogaiga, nuami i na 'ivina nika 'wa na 'asetai ava'ai 'Anu'anunu 'Atumaina i vonevoneyeni tovetumaganavo 'aila'a tulina tulina 'waimie.

'Asa'aiana bani'odi.”

Keliso yana vona me Sadisi faifaidi.

3 ¹Wata Keliso i voneku i vo, Nuanuaku 'u na kiluma i na nago 'atamana Sadisi, Yaubada yana anelose bei i miamiaga 'waineye, kumanina tovetumaganavo i 'i'isave'avinidi. 'U na kilumaga side bani'odi 'u na voneyedi 'u na vo,

Kumanina Yaubada 'Anu'anununa 7 wata 'ubwana 7 nimaneye, yana vona. Yami folova matatabuna a 'asetadi, 'ami 'isa 'wainega 'omi tovetumagana toketokemi, siwe mogitana 'omi wafawafami yami vetumagana mweadi. ²I lubwainemi matami i na 'anialadi yami vetumagananidi mweadi 'wa na kiavetoketokedi, kebu nuanuaku i na mwea-vagata. A 'asetai folovanidi 'akonadi 'wa 'idewadiga bola kebu i da ve'atumaigotoga yaku Yaubada mataneye. ³Fai kebu i da ve'atumaiga ve 'wa 'ewaiga wata 'wa nogai kebu nuami i na fani, 'wa na nuanuanidi, yami sakona 'wa na vedumwe'ubu'ubusedi 'wa na vematayakayaka. 'Ai'edi kebu 'wa na 'isa'isa 'wa na sakosakona yau a na vaimwaimwa a na le'wa yawaimi i na lovoga.

⁴'We'e 'ifwaimi me Sadisi yami sauluva tonovidi 'wa da vo bani'odi 'ami kaleko vunavunagidi, sakona 'waidiega kebu 'wa da 'iveyokemiga. Yami sauluva tonovidi begaidi 'ami fata ma 'ami kaleko 'avu'avudi taiadi ta na yabayaba. ⁵“Egavo 'wa na vetoketokega faifaiku, matatabumi 'wa na vekaleko 'avu'avudiega wata 'ami wagava kebu a na 'u'umidiga yaku buki 'wainega. Bukinina nageneye tomotoganidi mia 'atumaina wata miamia-vagaina i na veluagai bei 'adi wagava i 'eno'enovi. Tamaku mataneye wata yana anelose matadie a na vo, De'e tomotoganidi yaku tomotoga.”

⁶Vona de'e 'wa nogaiga nuami i na 'ivina nika 'wa na 'asetai ava'ai 'Anu'anunu 'Atumaina i vonevoneyeni tovetumaganavo 'aila'a tulina tulina 'waimie.

'Asa'aiana bani'odi.”

^s 3:1 ^t 1 Tes 5:2 ^u 3:4 Iud 1:22-23; Luk 10:20 ^u 3:5 Mad 10:32

Keliso yana vona me Filadofia faifaidi.

⁷Wata Keliso i voneku i vo, Nuanuaku 'u na kiluma i na nago 'atamana Filadofia, Yaubada yana anelose bei i miamiaga 'waineye, kumanina tovetumaganavo i 'i'isave'avinidi. 'U na kilumaga side bani'odi 'u na voneyedi 'u na vo,

Kumanina magemagetana wata yana sauluva matatabuna tonovidi, yana vona. Basenadiotoga Kini Devida 'atamana Ielusalema 'ana toveimea, tomotoga yadi luku i veveimeyeni. Yau wata ma yaku veimea, 'ai'edi saiboda a na sibaleniga, kebu tamu aitoi 'ana fata i na siboda-vaitugani, we'e 'ai'edi a na sibodaiga, kebu tamu aitoi 'ana fata i na sibaleniga.

⁸Yami folova a 'asetadi wata a 'asetai yami vetoketokena siaina siwe yaku vona 'wa vematayakeyakedi wata yami vetumagana 'waikuye kebu 'wa da 'ivemweamweadiga. Matamie saiboda a sibaleni, kebu tamu aitoi 'ana fata i na siboda-vaitugani. ⁹W A na vonemi. Me Diu 'ifwaidi vita i vevelemiga siwe yadi sauluva sakoidi 'waidiega ta 'asetadi taunidi kebu Diu mogitana, Seitani yana 'aila'a. Yaku veimea 'wainega tovekalinidi i na mai 'waimie ma yadi ve'ililibu i na be'u 'agemie wata i na ve'awamogitana a nuakalikiemi faifaina. ¹⁰Tokemaiga vonana basenadi a voneyeniga 'wa vematayakeyakeni begaidi tutuyanina vita bwaikidi i na souyedi tomia fwayafwaya matatabumi 'waimie i na silubumiga, yau a na 'ita'ita'iemi.

¹¹xSai'afoga a na wai 'waimie yami toketokenanina siaina 'wa na 'i'isave'avini, kebu nuanuaku tamu aitoi i na elomi yami tokemaiga 'ana tutula. ¹²yEgavo i na vetoketoke faifaiku, a na silakaidi bega yaku Yaubada yana vanuga 'eba velu'ui nageneye i na vefolova, bei tutuya matatabuna i na miamia Yaubada mataneyeye. Tomotoganidi 'waidie wagava 'aitonu a na kilumidi. Yaku Yaubada 'ana wagava, Yaubada yana 'atamana bwaikina 'ana wagava Ielusalema 'Ivauna, kumanina 'awaie abamega i na obuma yaku Yaubada 'wainega, wata 'aku wagava 'ivauna.

¹³Vona de'e 'wa nogaiga nuami i na 'ivina nika 'wa na 'asetai ava'ai 'Anu'anunu 'Atumaina i vonevoneyeni tovetumaganavo 'aila'a tulina tulina 'waimie.

'Asa'aiana bani'odi.”

Keliso yana vona me Lodisia faifaidi.

¹⁴zWata Keliso i voneku i vo, Nuanuaku 'u na kiluma i na nago 'atamana Lodisia, Yaubada yana anelose bei i miamiaga 'waineye, kumanina tovetumaganavo i 'i'isave'avinidi. 'U na kilumaga side bani'odi 'u na voneyedi 'u na vo,

v 3:7 Ais 22:22 w 3:9 Ais 60:14 x 3:11 Iem 1:12 y 3:12 Ve 14:1 z 3:14 Kol 1:15; Ve 19:11

Kumanina yana sauluva matatabuna tonovidi wata ma 'ana vetumagana i lulu'ivona mogitana Yaubada 'ana 'asetai faifaina, wata taunina Yaubada 'ana 'idewadewa matatabuna lamudi, yana vona. ¹⁵a Yami folova 'akonadi a 'asetadi, kebu 'wa da bailekuga siwe wata kebu 'wa da vematayakeyakekuga. Nuanuaku 'wa na vevematayakeyakeku siwe fai kebu nuanuami, 'asa'aiana 'wa na bailamo. ¹⁶Omi bani'odi faleda ufana legalegana, tomotoga kebu nuanuadi. Ufa fayona 'atumaina 'omi kebu bani'odiga wata kebu bani'odi alu'ai yauyaugina. Fai 'omi legalegami a na 'alaiwagemi. ¹⁷b Omi yami nuanua 'wa vo 'ako, 'Ima a ve'ai'aiwabu yama kukua fuedi, 'akonadi 'ama fata." Siwe kebu 'wa da 'asetai 'omi mogitana 'wa vewekowekoma yami mia vitana. Nani 'atumaidi 'wa bavuyedi bani'odi matami i sako, wata 'omi bani'odi tomotoga konekoned. Kebu tamu nani 'atumaina 'waimie i da 'eno'eno, nua'avami. ¹⁸c A vevelu'ase'ase mi nuanuaku nani 'atumaidi 'wa na kimwanedi 'waikuyega, bani'odi golida tomotoga i vevetagovi, golida 'atumai'avana i 'a'awakoluya, yoke i kokoiyavuleni. 'Wa na kimwanediga 'waikuyega 'wa na ve'ai'aiwabu mogitana. Wata kaleko 'avu'avudi wata vunavunagidi 'wa na kimwanedi 'waikuyega bega yami vekonekone 'ana bunumayaga i na 'a'ava. Wata mulamula 'waikuyega 'wa na kimwane matami 'wa na iwagidi bega 'ami fata nani 'atumaidi 'wa na 'isa'inanadi.

¹⁹d Egavo a nuakalikaliyedi yadi sakona faifaiddi a tatalabodedi wata a luluvematavulogidi bega yadi sauluva i na ve'atumi. Fai a nuakalikaliemi, 'ai'edi kebu 'wa na nuavilamiga vematavuloga a na velemi. Nuanuaku 'wa na vetoketoke faifaiku, wata yami sakona 'waidiega 'wa na nuavilami, taunimi 'wa na tauyemi mogitana 'waikuye. ²⁰e A na vonemi. Tomotoga nuanuadi i na lukuga ediavo 'waidie nagami tanotanogayega i na velutoli, wata yau bani'odi lilivamie a tovtovoi a vevelutoli nuanuaku a na luku yami nuanua 'waidie. 'Ai'edi aitoi bonaku i na nogai bega i na tauyeku, a na luku 'waineye a na veianeni wata i na veianeku.

²¹f Fai a vetoketoke, Tamaku i tauyeku taiadi 'a miamia yana 'eba miabui 'ai'aiwabuna 'waineye, wata bani'odi egavo i na vetoketokega faifaiku a na tauyedi yaku 'eba miabui 'waineye taiadi 'a na miabui.

²² Vona de'e 'wa nogaiga nuami i na 'ivina nika 'wa na 'asetai ava'ai 'Anu'anunu 'Atumaina i vonevoneyeni tovetumaganavo 'aila'a tulina tulina 'waimie.

'Asa'aiana bani'odi."

Tomia abama yadi subia Yaubada 'waineye.

4 ¹ Keliso yana vona tovetumaganavo 'adi 'aila'a 7 faifaiddi i 'a'ava, mulieta a 'isalaka, abame tamu saiboda i sibaleniga a 'iseni. Bonanina bani'odi

a 3:15 Lom 12:11 b 3:17 Luk 12:21; Iem 2:5 c 3:18 Ais 55:1 d 3:19 Ibu 12:7
e 3:20 Ion 14:23 f 3:21 Mad 19:28

evulega butu'aina nagami a nogaiga, wata i voneku i vo, 'U mai 'waikuye, naninidi 'ako i na souyediga a na vemu.”^{2g}I vona'a'avana nika mogitana 'Anu'anunu 'Atumaina i ageku. Abame tamu tomotoga a 'iseni 'eba miabui 'ai'aiwabuna 'waineye i miamia.^{3h}Tomotoganina 'aninamanamalina 'ana 'isa'isa bani'odi kilifou 'alo tamu kileu yamoyamoina 'ana wagava Kaneliani. 'Eba miabuinina 'waineye abavole i vetovoia 'ana 'isa'isa kileu 'ala'alawina 'ana wagava Emelodi.⁴Tomotoganina lilivaneye, wata a 'isedi 'eba miabui 'ai'aiwabudi 24 i yatovivivili, 'eba miabuinidi 'waidie to'edakumetavo 'au'auveadi 24 i miabui, 'adi kaleko 'avu'avudi we'e 'unu'unudie kunabanaba golida i yatodi, i veveimea 'ana 'eba 'isa.⁵'Eba miabuinina 'wainega mageta i kikianamali, butu'aina a nogai bani'odi bona bwaikidi, wata bani'odi tomuyoana i dududuya. Wata 'eba miabuinina maiginega dukala i magemagetadi matatabuna 7, magetanidi taunidi 'asa'aiana Yaubada 'Anu'anununa 7.⁶ⁱWata i vagamaiga tamu nani a 'iseni 'wa da vo eyaga niwalova 'atumaiotogina, 'aninamanamalina kilifou bani'odi.

Wata 'eba miabui 'ai'aiwabuna lilivaneye nani ma yawaidi toketokedi 4 i tovfifinini.⁷Naninidi tomogodi mata 'ana loi, tamu 'ana 'isa'isa sifu walawala'ai bwaikaotogina 'ana wagava laioni, tamu bulumakau 'ana 'isa'isa, tamu maigina 'wa da vo tomotoga maigina, wata tamu manubutu 'ana 'isa'isa, i yaveyavega.^{8j}Naninidi 'aitamogana 'aitamogana fafedi 6, nagedie wata tabwadie mata 'ana loi. Lovana, 'aiata yadi folova lei, kebu i da veveawaiga i vo,

Magemagetana,

Yaubada bwaikaotogina, yana veimea toketokena,

Magemagetana.

Basenadi i miamia, 'asiau i miamia, wata boladiotoga i na miamia.”

^{9-10k}Tutuya fuedi naninidi 4 yadi lei-subisubia 'wainega kumanina miamia-vagaina i miabui 'eba miabui 'ai'aiwabuna 'waineye i awa'ai'aia, i veve'ililibu wata i vevekaiwa 'waineye. Tutuyanina i lei-subisubia wata to'edakumetavo 'au'auveadi 24 ma yadi ve'ililibu i be'ube'u kumanina miamia-vagaina yana 'eba miabui 'ai'aiwabuna mataneye i subisubiai. Yadi vetoveimea 'ana 'eba 'isa kunabanaba i tawetawedi mataneye i leilei i vo,

¹¹'Omu yama Yaubada wata 'ama Toveimea,

Subia, ve'ililibu wata toketokena 'amu laubwaina 'u na veveluagadi, fai 'omu nani matatabuna 'u 'idewadi,

Taunimu yamu nuanua 'wainega i souyedi bega 'asiau ma yawaidi i 'eno'enovi.”

Isu taunina 'asa'aiana Yaubada yana Sifi Siaina.

5 ¹Yadi lei i 'a'ava, mulieta kumanina i miabui 'eba miabui 'ai'aiwabuna 'waineye 'ana 'atagie tamu lubulubu nunumina a

'iseni. Lubulubunina ma vi'avi'aina i kilumi, i nunumina i 'iyogoyogoni matatabuna 7, siwe veve'etobodana. ²Tamu anelose toketokena a 'iseni i toke i vegole i vo, Aitoi ma yana veimea bega 'ana fata yogoyogonanidi i na yavudi lubulubu i na siyawayawagi i na lu'iaawawai?" ³'Ana yavu wata 'ana lu'iaawawa faifaidi i lauala siwe kebu tamu aitoi i da veluagai abame, fwayefwayeye wata towafa 'waidiega. ⁴Begaidi a nuavita bwaikina a 'we'wela fai kebu tamu aitoi ma yana veimea bega 'ana fata i na yavuya wata i na lu'iaawawai. ⁵A 'we'we'wela nika tamu to'edakumeta 'au'auveana i voneku i vo, 'U ve'wada 'u 'isanago. Tamu Kini Devida tubuna bwaikina, Iuda 'ana wauma 'wainega i vetoketoke. Taunina toketokeotogina bani'odi sifu walawala'ai bwaikaotogina 'ana wagava laioni, ma yana veimea bega 'ana fata yogoyogonanidi 7 i na kiadabadi wata i na siyawayawagi."

⁶'Tomogonina toketokena a 'isadabeni nika Yaubada yana Sifi Siaina^m a 'iseni i tovoovoi Yaubada yana 'eba miabui 'ai'aiwabuna kamwaneye, we'e nani ma yawaidi toketokedi 4, to'edakumetavo 'au'auveadi 24 taiadi i tovfifinini. Sifinina Siaina ma 'ana bwaya, 'ana 'isa'isa basenadi i wafa siwe i tovoi-vaitugana. 'Edu'eduneye alana 7," we'e matana 7, matananidi 'asa'aiana Yaubada 'Anu'anununa 7 kumanidiavo i vetunedi 'awalawa matatabuna 'waidie. ⁷⁻⁸'Sifinina Siaina i nago lubulubunina i 'ewai Yaubada 'ana 'atagiega nika bei nani ma yawaidi toketokedi 4 wata to'edakumeta 'au'auveadi 24 taiadi ma yadi ve'ililibu i be'u mataneye. 'Aitamogana 'aitamogana ma yadi 'eba lauinava gita wata 'aivoe 'atumaidi nimadie, golidi 'wainega i 'idewadi. 'Aivoenidi nagedie tamu vane i veadagidi i na kabuniga magaina 'atumaina, 'ana 'asete Iesu yana tomotoga yadi velu'ui Yaubada 'waineye. ⁹"Tamu lei 'ivauna i leieni Keliso 'waineye i vo,

Vona mogitana 'omu ma yamu veimea, bega lubulubu nunumina 'u 'ewai,

'Ana yogoyogona 'u na kiadabadi.

I lubwainemu, fai i luvewafamu bega dayagimu 'wainega tomotoga fuei 'u tuveobudi Yaubada faifaina.

Tomotoganidi i maia 'aila'a 'aitamogana 'aitamogana 'waidiega, mali bonana 'waidiega, tomotoga tulidi tulidi, 'awalawa 'aitamogana 'aitamogana 'waidiega.

¹⁰"Tomotoganidi 'u tuveobudiga, i luku Yaubada yana 'Eba Veimea nageneye i na vetofolova faifaina 'asa'aiana yana tovelomu, bega tomia fwayafwaya i na veimeyedi."

¹ 5:6 Sek 4:10; Ion 1:29 ^m 5:6 Yaubada yana Sifi Siaina 'asa'aiana taunina Iesu.

ⁿ 5:6 Ala 'adi nuanua veimea wata toketokena. ^o 5:8 Ve 8:3-4, 15:2; Same 141:2

^p 5:9 Same 98:1 ^q 5:10 Ais 61:6; Ve 20:6, 22:5; 1 Fit 2:9

Tomotoga matatabudi Iesu i subiai.

¹¹Leinina i 'a'ava, wata a 'isadaba nika anelose a 'isedi, 'adi 'aila'a fueotogidi kebu tamu aitoi 'ana fata i na lu'iwawadi. Yaubada yana 'eba miabui 'ai'aiwabuna, nani ma yawaidi toketokedi 4, to'edakumeta 'au'auveadi 24, matatabudi nageneye, we'e anelosenidi fueotogidi i tovifinedi. ¹²Bonadi bwaikinega a nogai i leilei i vo,

Yaubada yana Sifi Siaina i wafa,

Veimea, 'ai'aiwabu, 'aseta wata toketokena 'ana laubwaina i na veveluagadi.

I lubwaineda ta na veve'ililibuyeni, ta na awa'ai'aia wata ta na subisubiai.”

¹³Anelose fueotogidi abame i lei'a'ava, nika wata Yaubada 'ana 'idewadewa matatabudi i velamu i lei. 'Ana 'idewadewanidi abame i miamiani, fwayefwayeye, towafa yadi 'eba mia 'waineye, eyage, wata 'awalawa matatabuna 'waidie, i leilei i vo,

Taunina yana 'eba miabui 'ai'aiwabuna 'waineye i miamiaga, wata yana Sifi Siaina taiadi, i lubwainedi subia, ve'ililibu, 'ai'aiwabu wata toketokena i na veveluagadi.

Kebu i na 'a'ava, i na 'eno-vagata.”

¹⁴I lei'a'ava, mulieta nani ma yawaidi toketokedi 4 bonadi i tutuli i vo, Vona mogitana, 'ima wata yama nuanua bani'odi,” we'e to'edakumeta 'au'auveadi ma yadi ve'ililibu i be'u matadie i subiadi.

Yogoyogonanidi 7 i kiadabadi.

6 ¹Leinidi i 'a'ava mulieta Yaubada yana Sifi Siaina a 'iseni yogoyogonanidi 'waidiega tamu i kiadabai nika nani ma yawaidi toketokedi 4 tamu iadi bonana a nogai. Bonananina bwaikina 'wa da vo tomuyoana i da duduya i voneku i vo, 'U mai.” ²A 'isanago 'aisaya osi 'avu'avuna a 'iseni, kwavuneye tamu tomogo ma yana tufu, 'unu'ununeye kunabanaba 'ai'aiwabuna i yatoi, toveimea 'adi vaigavu, i tauya i nunago i na vetalaga i na vetoketoke.

³Sifinina Siaina yogoyogonanidi 'ana veluga i kiadabai nika nani ma yawaina toketokena 'ana veluga bonana a nogai i vo, 'U mai.” ⁴A 'isanago tamu osi i souyeni siwe yamoyamoina. Osinina kwavuneye tamu tomotoga ma yana veimea bega tomotoga fueidi fwayefwayeye tauni'avadi i na vevetalaga wata tauni'avadi i na luluvewafadi. Kefata bwaikina i 'idewaiga kainumu 'wainega i veleni.

⁵I 'a'avana mulieta Sifinina Siaina yogoyogonanidi 'ana vetonu i kiadabai nika nani ma yawaina toketokena 'ana vetonu bonana a nogai

i vo, 'U mai." A 'isanago tamu osi 'wau'waugina i souyeni, kwavuneye tamu tomogo, kukua 'adi vita 'adi 'eba 'etowava nimaneye. ⁶Bona a nogai 'wa da vo tamu tomogo i da vegole, nani ma yawaidi toketokedi 4 'awawasadiega i vo,

Tomotoga fueidi i na folofolova, we'e 'aiata 'aitamogana 'ana tutula i na 'ewai, tutulanina matatabuna 'wainega 'ana fata 'ani'ani siaina i na kimwanei bani'odi 'uvi 'aitamogana 'alo tafioko 'aitonu. We'e welavi 'atumaidi kebu 'u na 'ivesakodi bega bunama wata oine i na 'eno'enovii."

⁷I vona'a'ava, mulieta Sifinina Siaina yogoyogonanidi 'ana ve-4 i kiadabai, nika nani ma yawaina toketokena 'ana ve-4 bonana a nogai i vo, 'U mai." ⁸'A 'isanago tamu osi a 'iseni tomogona 'adalina, kwavuneye tamu tomogo 'ana wagava Wafa, we'e mulineye tamu osi 'ana tomotoga 'ana wagava Towafa-yadi-'eba-mia." Tomotoganidi 'adi 'ailuga ma 'adi veimea i tauyedi 'adi fata tomia fwayafwaya fueidi i na luvewafadi. I na vo, 'A na nikedi side bani'odi, 'ifwaidi tauni'avadi i na vetalaga i na wafa, 'ifwaidi lokayega i na wafa, 'ifwaidi viga sakoidi 'waidiega i na wafa, we'e 'ifwaidi 'aisaya walawala'ai i na ovadi i na wafa." Tomotoganidi i na wafaga side bani'odi 'adi 'aila'a. Tomia fwayafwaya matatabudi ta da 'idiaga 'aila'a 4, 'aila'a 'aitamogana bani'odi taunidi towafa.

⁹To'ainikenidi 'adi 'ailuga i nagoi, mulieta Sifinina Siaina yogoyogonanidi 'ana ve-5 i kiadabai nika Yaubada yana 'eba velomu a 'iseni. 'Eba velomunina dibuneye Yaubada yana Vona 'ana tolu'ivonavo 'anu'anunudi a 'isedi, kumanidiavo basenadi tosakona i luvewafadi yadi tokemaiga Iesu 'waineye faifaina. ¹⁰"Towafanidi matatabudi i toke i vegole bonadi bwaikinega i vo, 'Ama Toveimea toketokemu wata magemagetamu, yamu sauluva matatabuna tonovidi. Ma'avia tomia fwayafwaya i na vonayavuga bega 'u na veimea tomotoganidi i luvewafamaga vematavuloga i na veluagai?" ¹¹"Aitamogana 'aitamogana kaleko 'avu'avudi i veledina i vonedi i vo, Sai'afu 'wa na lulukamata, nagami emiavo taunidi Iesu yana tofolovavo 'ifwaidi i na luvewafadi, mulieta 'ami 'aila'anina nuanuaku i na veluagai nika bei vematavuloga i na souyeni."

¹²"I vona'a'ava, matakuye Sifinina Siaina yogoyogonanidi 'ana ve-6 i kiadabai nika yoyoyo bwaikina i yue. Inala i lu'waugi igovala bani'odi, weta'i vivivilina i yamota 'wa da vo dayaga. ¹³'Ubwana fueidi i avuta 'wa da vo kaukau bwaikina i da nunuga welavi ididi i da avuta. ¹⁴Abama ava'aiamo i nago 'wa da vo 'ile i da nunumi we'e 'oya wata imula matatabudi i fetu wata i ve'ani'idi'idi.

^t 6:8 Isi 14:21 ^u 6:8 Me Guliki bonadi Edesi. ^v 6:9 Ion 16:2 ^w 6:10 Ve 16:5-7
^x 6:11 Ve 3:4-5, 7:9,13-14 ^y 6:12 Mad 24:19

¹⁵ Tutuyanina naninidi i souyedi a 'isedi, tomia fwayafwaya yadi kini, toveimeavo, gavia 'ana to'edakumetavo, tove'ai'aiwabu, tovetoketoke, tofolova-maimaiga wata tomotoga yavuyavudi, matatabudi i dega i ve'alagivagiva watu'ae wata ovuye. ¹⁶ I vegolegole 'oya wata kileu 'waidie i vo, 'Wa 'anita'imi 'wa tavunima, nika kumanina 'eba miabui 'ai'aiwabuna 'waineye i miamiaga kebu 'ana fata i na 'isema, wata yana Sifi Siaina yana nuasako kebu i na sousouyeni 'waimeye. ¹⁷ 'Wa na givema fai yadi 'aiata bwaikina 'akonadi i souyeni, ma yadi nuasako i na vematavulogima. Kebu tamu aitoi 'ana fata i na vetoketoke 'adi 'ailuga yadi nuasako 'waidiega.”

Me Isileli 'ifwaidi tugusa i na 'ewadi Yaubada 'wainega.

7 ¹ Yaubada yana nuasako i souyeni a 'iseni mulieta anelose 4 a 'isedi fwayafwaya i tovfifinini kaukau matatabudi i tatalabodedi bega kebu i na nunuga eyage wata fwayefwayeye wata welavi lukudi kebu i na fetu. ² Wata tamu anelose a 'iseni inala yana 'eba lakayega i souyeni, nimaneye Yaubada Miamia-vagaina yana tugusa yana tomotoga faifaidi. I toke i vegole anelosenidi 4 'waidie, kumanidiavo Yaubada toketokena i veledi bega fwayafwaya wata eyaga i na 'ivesakodi. ³ "I vegole 'waidie i vo, Fwayafwaya, eyaga wata welavi kebu 'wa na 'ivesakodiga, 'wa na lulukamata nagami yada Yaubada yana tofolovavo 'adi tugusa 'a na yatodi debadie.” ⁴⁻⁸ Tugusa i yatodi i 'a'ava mulieta i voneku 'adi 'aivia tomotoga 'waidie Yaubada yana tugusa i yatodi debadie. Me Isileli tomotoga wauma 'aitamogana 'aitamogana tugusa i 'ewadiga, 'adi luvetubama 144,000.

Iuda 'ana wauma 'wainega tomotoga 12,000 'waidie tugusa i yatodi.

Lubeni 'ana wauma 'wainega tomotoga 12,000 'waidie tugusa i yatodi.

Gada 'ana wauma 'wainega tomotoga 12,000 'waidie tugusa i yatodi.

Asa 'ana wauma 'wainega tomotoga 12,000 'waidie tugusa i yatodi.

Nafitalai 'ana wauma 'wainega tomotoga 12,000 'waidie tugusa i yatodi.

Manasa 'ana wauma 'wainega tomotoga 12,000 'waidie tugusa i yatodi.

Simioni 'ana wauma 'wainega tomotoga 12,000 'waidie tugusa i yatodi.

Livai 'ana wauma 'wainega tomotoga 12,000 'waidie tugusa i yatodi.

Isaka 'ana wauma 'wainega tomotoga 12,000 'waidie tugusa i yatodi.

Sebuloni 'ana wauma 'wainega tomotoga 12,000 'waidie tugusa i yatodi.

Iosefa 'ana wauma 'wainega tomotoga 12,000 'waidie tugusa i yatodi.

Beniamina 'ana wauma 'wainega tomotoga 12,000 'waidie tugusa i yatodi.

Side waumanidi 'waidiega me Isileli matatabudi 144,000 'waidie Yaubada yana tugusa i yatodi.

'Aila'a fueotogidi Yaubada i subisubiai.

⁹^bMe Isileli 'adi tugusa i yatodi i 'a'avana, nika wata a 'isedi 'aila'a fueotogidi, lu'iawawa-wayoga. Tomotoganidi i maia 'aila'a 'aitamogana 'aitamogana 'waidiega, mali bonana 'waidiega, tomotoga tulidi tulidi, 'awalawa 'aitamogana 'aitamogana 'waidiega. Matatabudi 'adi kaleko vunavunagidi wata 'avu'avudi i ve'wesenedi wata nimadie saisai lukudi, i tovtovoi Yaubada yana 'eba miabui 'ai'aiwabuna wata yana Sifi Siaina matadie. ¹⁰Tomotoganidi i toke i vegole i vo,

Yaubada, kumanina 'eba miabui 'ai'aiwabuna 'waineye i miamiaga, wata yana Sifi Siaina 'akonadi i 'ita'ita'ieda sakona 'waidiega.”

¹¹⁻¹²Anelose matatabudi, to'edakumeta 'au'auveadi, wata nani ma yawaidi toketokedi 4, 'eba miabuina 'ai'aiwabuna i tovifinini. Matatabudi i lumata'afufu Yaubada mataneye i subisubiai i vo,

Vona mogitana yada nuanua side bani'odi.

Yaubada i lubwaineni subia, 'ai'aiwabu, 'aseta, vekaiwa, ve'ililibu, veimea wata toketokena i na veveluagadi,

Kebu i na 'a'ava, i na 'eno-vagata.

'Asa'aiana yada nuanua bani'odi.”

¹³“Tamu to'edakumeta 'au'auveana i velutolieku i vo, Kumanidiavo 'adi kaleko vunavunagidi wata 'avu'avudi 'u da 'asetadi egavo wata ava'aiega i maia?” ¹⁴⁻¹⁵“Bonana a tutuli a vo, 'Auvea, yau kebu a da 'asetadiga, 'u da voneku.” Wata i voneku i vo,

Tomotoganidi i maia vita bwaikidi i souyediga fwayefwayeye, 'waidiega. Iesu yana wafa 'wainega i ve'atumaotoga 'wa da vo 'adi kaleko Sifi Siaina dayaginega i da lekoadi bega i da vevunavunaga, faifainanina abame 'aiata wata lovana Yaubada yana vanuga 'eba velu'ui nageneye, Yaubada mataneye i tovtovoi i folofolova faifaina. Kumanina 'eba miabui 'ai'aiwabuna 'waineye i miamiaga, taunina yana toketokena 'wainega i na 'i'ita'ita'iedi. ¹⁶Kebu tamu tutuya wata i na lase 'alo 'anigodi i na lala, inala 'alo yauyauta bwaikina 'waidiega kebu i na veviga. ¹⁷“Kebu tamu sai'afu vita i na veluagai fai Sifinina Siaina, kumanina 'eba miabui 'ai'aiwabuna kamwaneye i miamiaga, i na 'i'isave'avinidi bani'odi to'isave'avina sifi yana 'aisaya i 'i'isave'avinidi. I na nunawedi ufa luluvuala 'waidie, ufanina 'wainega mia 'atumaina wata 'ivauna i sousouyeni, wata Yaubada nuadi i na 'iveololodi nika kebu tamu tutuya i na 'we'welaga.

^b 7:9 Ve 5:9 ^c 7:13 Ve 7:9 ^d 7:14 Mad 24:21; 7:15 Ais 49:10 ^e 7:17 Ve 21:4; Same 23:2; Ais 25:8

Yogoyogonanidi 'ana ve-7 i kiadabai.

8 ¹Wata a 'isanago a 'iseni Yaubada yana Sifi Siaina lubulubu nunumina yogoyogona 'ana ve-7 i kiadabai, nika abame nani matatabuna kulukulu i lovogi bani'odi 'awasasa sai'afu.

²I 'a'avana mulieta Yaubada yana anelose 7, kumanidiavo mataneyeyi i tovtovoi a 'isedi, 'aitamogana 'aitamogana yadi evulega i veledi.

³⁻⁴^fWe'e tamu anelose ma yana 'aivo'e golida vane faifaina, i maiga 'eba velomu lilivaneyeyi i tovoi. Yaubada vane bwaikina i 'ewai anelosenina i veleni i na kabuni 'eba velomu golida 'waineyeyi, 'eba velomunina i tovtovoi Yaubada yana 'eba miabui 'ai'aiwabuna mataneyeyi. Vanenina i kabuniga Yaubada yana tomtoga yadi velu'ui 'ana 'imoso'i, lufwa magaina 'atumaina i laka velu'uinidi taiadi Yaubada mataneyeyi anelose nimanemo. ⁵Anelosenina 'ai 'ala'alaina i 'ewadi 'eba velomu 'wainega i vedodogi vane 'ana 'eba vedodoga 'waineyeyi. I vedodogidi i 'a'avana i toke i taweni i obu fwayefwayeyeyi nika tomuyoana i kianamali wata i duduya, butu'ai bwaikidi wata yoyoyo i yue.

Evulega 7 i yuvedi.

⁶Ai 'ala'alaina i taweni i obu fwayefwayeyeyi i 'a'ava mulieta anelosenidi 7 yadi evulega nimadie a 'isedi i na yuvedi.

⁷^gNagami, tamu yana evulega i yuveyiga, 'ai 'ala'alaina, dayaga, wata 'wei mwadodoudi bani'odi aisi i avuta fwayefwayeyeyi. Fwayefwaya vi'ai 'aitonu, vi'ai 'ailuga 'atumaidi we'e vi'ai 'aitamogana i 'alai, wata bani'odi welavi wata mosomoso.

⁸⁻⁹^hAnelose 'ana veluga yana evulega i yuveyiga, tamu nani 'ana 'isa'isa bani'odi 'oya bwaikina i lubeanunuga malaveseyeyi i taweni. Eyaga vi'ai 'aitonu, vi'ai 'ailuga 'atumaidi we'e vi'ai 'aitamogana i yamota bani'odi dayaga, bega vi'ainina nageneyeyi igana matatabudi i wafa wata waka i 'aniweawealidi.

¹⁰⁻¹¹Anelose 'ana vetonu yana evulega i yuveyiga, tamu 'ubwana bwaikina i 'alata dukala bani'odi abamega i 'anita'ia ufa bwaikidi wata ufa-luluvuala 'ifwaidi 'waidie. Ufa vi'ai 'aitonu, vi'ai 'ailuga 'atumaidi we'e vi'ai 'aitamogana i vegolagola bani'odi 'alu bega tomtoga fueotogidi i yemuga i ve'alawafawafa. 'Ubwananina i 'anita'iga 'ana wagava Gola.

¹²Anelose 'ana ve-4 yana evulega i yuveyiga, inala, weta'i wata 'ubwana i 'isamata'weu'weu. Inala vi'ai 'aitonu, vi'ai 'ailuga 'atumaidi we'e vi'ai 'aitamogana i dudubali. Wata bani'odi weta'i wata 'ubwana bega fwayefwayeyeyi lovana wata 'aiata yadi mageta i vesiai.

^f 8:3-4 Ve 5:8 ^g 8:7 Ioe 2:30; Sou 9:23 ^h 8:8-9 Sou 7:20-21

¹³ I 'a'avana a 'i'isadabaga nika a nogai manubutu butu'aina. Tabwaotogineye i luluwivila i toke i vegole i vo, Ieu, 'omi tomia fwayafwaya nuakalikalmi. Tutuyanina anelose 'adi 'aitonu 'aitamogana 'aitamogana yana evulega i na yuveiga, vita bwaikaotogidi tulina tulina i na sousouyedi 'waimie.”

Evulega 'ana ve-5 i yuvei.

9 ¹ Manubutu i tauya i nago, mulieta anelose 'ana ve-5 yana evulega i yuvei, tamu tomotoga 'aninamanamalina i obu fwayefwayeye 'wa da vo 'ana 'isa bani'odi 'ubwana i da 'anita'ia abamega. I obuga, Vatu'ai Manamanawena, yaiaina yadi 'eba mia 'ana 'eba yavu i 'ewai i mieni i yavuya. ² I yavuya nika lufwa bwaikina i souyeni 'wa da vo libi domwa-tuaina lufwana bega inala matana i umai yana mageta i 'awaduguli, abama 'ana 'isa'isa bani'odi igovala. ³ Lufwanina 'wainega limwana fue di i obu tanotanoge i vetuli yadi 'aiova i vekasikasisi bwa'o'o'o bani'odi. ⁴ Limwananidi tatalabodadi kebu 'adi fata 'ani'ani i na 'ivesakoidi wata bani'odi mosomoso 'alo welavi. Tomotoga fue di i na ovadi, we'e tomotoganidi Yaubada yana tugusa debadie i yatodiga, kebu i na ovadiga.” ⁵ I vonedi i na ovadimo we'e 'ivewafa faifaina kebu i da tauyediga. Weta'i 5 nagedie i na ovaovadi bega i na veveviga bwaikina bani'odi bwa'o'o'o yadi 'aiova. ⁶ Veviganina faifaina tomotoga i na vo, 'A da wafa, veviga 'a baila,” siwe Yaubada kebu i na tauyedi i na wafaga.

⁷ Limwananidi 'adi 'isa'isa 'wa da vo 'aisaya osi kaleko kainumu 'wainega i da 'ivivigavudi vetalaga faifaina. Ma 'adi veimea bega debadie 'adi vaigavu golida i yatodi, maigidi 'wa da vo tomotoga maigidi. ⁸ Nava'audi manamanawedi, nigodi manamanawedi wata nigonigodi bani'odi 'aisaya laioni nigodi. ⁹ Nuafoudie 'adi vaigavu 'ana 'isa'isa kaleko kainumu, fafedi butu'aidi bwaikaotogidi 'wa da vo 'aisaya osi waka fwayafwaya fue di i da luluyo'edi vetalaga faifaina. ¹⁰ We'e giudi bani'odi bwa'o'o'o giudi, 'waidiega tomotoga i na lovelovenidi weta'i 5 nagedie. ¹¹ Vatu'ai Manamanawena 'ana to'isave'avina kumanina wata limwananidi 'adi toveimea. 'Ana wagava me Diu bonadiega Abadoni, we'e me Guliki bonadiega Afoloni 'ana saivila To'ivesako. ¹² 'De'e vitanina i 'a'ava, vita 'ailuga wata sai'afoga i na souyedi.

Evulega 'ana ve-6 i yuvei.

¹³ Anelose 'ana ve-6 yana evulega i yuveiga, bona a nogai i mai 'eba velomu kamwanega. 'Eba velomunina golida 'wainega i 'idewai Yaubada mataneyi i tovtovoi.

¹⁴ Bonananina a nogaiga, i vonavona anelose 'ana ve-6 'waineyi i vo, Anelosenidi 4, basenadi i yogonidi i yatodi ufa bwaikina 'ana wagava

Iufiletisi 'waineye, 'u na yavudi i na nagoi.” ¹⁵ Anelosenidi 4 i yavudiga basenadi i 'idewadi i yatodi bega 'awasaanina, 'aiatanina, weta'inina wata malamalanina i venua'ivineniga 'waineye i na souyedi tomotoga fueodi i na luwewafadi. Tomia fwayafwaya 'adi 'aila'a vi'ai 'aitonu. 'Ailuga 'atumaidi we'e vi'ai 'aitamogana i na luwewafadi. ¹⁶ Anelosenidi 4 tovetalaga fueotogidi i 'edakumesedi, 'adi 'aila'a i lu'ivoneyeni 'waikuye, matatabudi 200 milioni (200,000,000).

¹⁷⁻¹⁸ Wata a 'iseni 'wa da vo a da 'enotalailoilyedi tovetalaganidi osi kwavudie i laka i nunagoi. Nuafoudie 'adi kaleko kainumu, 'ifwaidi yamoyamoidi 'wa da vo 'ai-'ala'alata, 'ifwaidi 'ala'alawidi 'wa da vo malaveta, 'ifwaidi 'ovu'ovudi 'wa da vo manufagila. Osi 'unu'unudi 'wa da vo 'aisaya laioni 'unu'unudi, we'e 'awadiega 'ai meana, lufwa wata manufagila 'ala'alaina i sousouyedi, 'waidiega tomotoga vi'ai 'aitamogana i luwewafadi, vi'ai 'ailuga 'atumaidi. ¹⁹ Osinidi yadi toketokena bega i na luluwewafadiga, 'awadie wata giudie fai giudi 'wa da vo 'o'olo 'unu'unudi bega tomotoga i nikenikedi.

²⁰ Vitanidi i 'a'ava, tomotoga 'ifwaidi i miamianiga bola i baibaila, kebu nuanuadi taunidi i na tauyedi Yaubada i na subisubiai. Nuanuadi Seitani enavo bani'odi yaiaina i na subisubiadi, wata kumaea i dabidi golida, siliba, kofa, kileu, wata welavi 'waidiega, i 'odu'odu 'waidie. Naninidi tomotogaotoga 'adi 'idewadewa kebu 'adi fata i na 'isa, i na nogaya, wata i na fetu siwe i subisubiadi.” ²¹ Wata kebu nuanuadi i na nuaviladi bega i na 'ailove luwewafa, ve'avula-'avo'avovo, vainago, wata 'adi 'afo'a i na baileidi.

Tamu anelose ma yana lubulubu.

10 ¹ Wata a 'isanago, tamu anelose toketokeotogina a 'iseni i obuobuma abamega. Waowa i 'avui i mimaieni, 'unu'ununeye abavole i vetovoia, maigina mataududulina inala bani'odi, we'e 'agena 'wa da vo bani'odi 'ai i da lu'aogi. ²⁻³ Nimaneye lubulubu nunumina siaina siwe i luyawagi. 'Agena 'ana 'atagi i ba eyage, 'ana wama 'avale, i toke i vegole 'wa da vo kuvakuvala butu'aina. I vegole'a'avana, nika tomuyoana 7 i dududi 'asa'aiana bonana i tutuli. ⁴ Tutuyanina i dududi i 'a'avana igodi yadi vona a da kilumidi siwe tamu bona a nogai abamega i voneku i vo, Naninidi tomuyoana 7 i voneyediga nuamuye i na 'eno'eno, kebu 'u na kilumidi.”

⁵⁻⁶ Anelosenina, kumanina i ba eyage wata 'avale nimana 'ana 'atagi i silakai i vegole i vo, A vona mogitana Yaubada 'ana wagavayega, kumanina miamia-vagaina, abama, fwayafwaya, eyaga i 'idewadi wata nani matatabuna. Kebu wata 'a na lulukamata. ⁷ Tutuyanina anelose

^m 9:15 Ve 8:7-12 ⁿ 9:20 Ve 16:9,11; Same 135:15-17

'ana ve-7 yana evulega i na yuvei, Yaubada yana nuanua givagivadi i na ve'a'ava-vagasedi, bani'odi basenadiotoga i voneyedi yana tofolovavo 'waidie, kumanidiavo i vetolu'ivona faifaina.”

⁸Bonananina a nogaiga abamega wata i vona-vaitugana 'waikuye i vo, 'U na nago anelosenina i бага eyage wata 'avale, nimanega lubulubu luyawagina 'u na 'ewai.”

⁹I vona'a'ava, a nago 'waineye a voneni a vo, Lubulubunina siaina nuanuaku 'u na veleku.” I voneku i vo, 'U na 'ewai 'u na 'ania, 'awamuye 'u na 'alatonoviga dibidibina bani'odi mai'awa, we'e bola kamomuye yuyuna.” ¹⁰Bega a nago lubulubunina a 'ewai nimanega, a si'auleni a 'alatonovi dibidibina 'wa da vo mai'awa. Siwe tutuyanina a tononi kamoku i 'aiova. ¹¹A 'ani'a'avai wata i voneku i vo, 'U na nago 'u na lu'ivona-vaitugana Yaubada yana Vona wata ava'ai sai'afoga i na souyediga tomotoga yadi toveimea taiadi 'waidie. Tomotoganidi bonadi tulina tulina i miamiani 'awalawa 'aitamogana 'aitamogana 'waidie.

Yaubada yana tolu'ivonavo 'adi 'ailuga.

11 ¹Mulieta 'eba 'etowava bani'odi waitogana i veleku i voneku i vo, 'U na tovoi 'u na nago Yaubada yana vanuga 'eba velu'ui wata 'eba velomu 'u na 'etowavadi. I na 'a'avana, tomotoganidi nageneye i subisubiaga 'u na lu'iawawadi. ²°Vanuganina kalikalina, inagenatantotogona kebu 'u na 'etowavaiga fai Yaubada i tauyeni mali tomotoga taunidi kebu Diu 'waidie. 'Atamananina Magemagetana 'waineye tomotoganidi i na veveimea wata nani fuei i na 'i'ivesakoidi weta'i 42 nagedie. ³Yaku tolu'ivonavo 'adi 'ailuga veimea a na veledi a na vetunedi Yaubada yana Vona i na lalau'age weta'inidi 42 nagedie 'alo 'aiata 1,260. 'Adi kaleko sakoidi niula 'adi baike bani'odi, tomotoga yadi 'eba 'isa i nuuavita faifaidi.”

⁴Tolu'ivonanidi 'adi 'ailuga bani'odi welavi Olive 'ailuga, wata bani'odi mageta 'eba yato 'ailuga i tovofovi 'Auvea mataneye, kumanina tomia fwayafwaya 'adi Toveimea. ⁵'Ai'edi egavo i na vo, Tolu'ivonanidi 'a na nikedi,” vita i na velugadi fai tolu'ivonanidi 'awadiega 'ai 'ala'alaidi i na souyedi 'adi gaviavo i na 'alaidi i na wafa. ⁶Ma yadi veimea weta'inidi 42 nagedie Yaubada yana Vona i na lalau'age, i na vona 'wei i na tova. Wata 'adi fata i na veimea ufa i na vedayaga wata 'ai'edi nuuadi tutuya fuei viga sakoidi tulidi tulidi i na sousouyedi tomia fwayafwaya 'waidie.

⁷Tutuyanina yadi lau'age i na 'a'ava, Vatu'ai Manamanawena 'wainega tamu tomotoga 'aisaya kasikasisina bani'odi i na souyeni, i na vetoketoke 'waidie i na luvewafadi. ⁸Tomogodi 'atamane i na 'eno'eno, 'atamananina 'ana wagava Ielusema, bei basenadi 'adi Toveimea tomotoga i tutufwaseni

'ai lagalagana 'waineye. 'Atamananina faifaina 'ana 'eba ve'ifiofio Sodoma 'alo Itifita, i awatalatutulediga fai Yaubada 'ana tovedumwe'ai'ai fueদি bei i miamiani. ⁹Towafanidi kebu tamu aitoi i na tauyedi i na tavunidi i na 'eno'enovı bega tomotoga fueদি 'aila'a 'aitamogana 'aitamogana 'waidiega, mali bonana 'waidiega, tomotoga tulina tulina 'awalawa 'aitamogana 'aitamogana 'waidiega i na mimaia 'aiata 'aitonu wata sai'afo nagedie i na 'ise'isedi. ¹⁰Tolu'ivonanidi 'adi 'ailuga yadi wafa faifaina tomia fwayafwaya i na sosoana, i na sakasakali wata i na ve!'une'une. I na sosoanaga fai tolu'ivonanidi ma yawaidie vita fueদি tomia fwayafwaya i veveledi.

¹¹Yau naninidi a 'ise'isedi 'wa da vo bani'odi a da 'enoneganega. Tomotoganidi towafa, a 'ise'isedi 'aiata 'aitonu wata sai'afo 'atamane i 'eno'enovı, mulieta Yaubada yawaina i sivedamani 'waidie nika i yawasa. Tomotoga matatabudi i 'isedi i tovoiga, i kololo bwaikina. ¹²'Tolu'ivonanidi 'adi 'ailuga i yawasana tamu bona i nogai i toke i vegole abamega i vo, 'Wa lakama." 'Adi gaviavo i 'isa'isa 'adi 'ailuga i lakalaka waowa 'wainemo i luku abame.

¹³I luku abame nika yoyoyo bwaikina i toke i yue tomotoga 7,000 i wafa. 'Atamananina nageneye tutu'ai 10, yoyoyo i yuega 9 'atumaidi, 'aitamogana 'wainega vanuga i 'anigeudi. Tomotoganidi ma yawaidi i miamianiga i 'iseni i kololo bwaikina begaidi Yaubada abame i subisubiai yana toketokena faifaina.

Anelose 'ana ve-7 yana evulega i yuvei.

¹⁴⁻¹⁵Vita bwaikina 'ana veluga a 'iseni i 'a'ava, 'ana vetonu sai'afoga i na souyeni fai anelose 'ana ve-7 yana evulega i na yuvei. I yuvei i 'a'avana abamega bona bwaikidi a nogaidi i vonavona i vo,

Tutuya de'e i velamu i na nagoga 'Aueva Yaubada wata 'ana Venua'ivina Keliso fwayafwaya wata 'ana tomotoga taiadi i na veveimeyedi, yadi veimeanina kebu i na 'a'ava, i na 'eno-vagata."

¹⁶'I vona'a'ava, nika to'edakumeta 'au'auveadi 24, kumanidiavo Yaubada mataneye 'eba miabui 'ai'aiwabuna 'waidie i miamiani, ma yadi ve'ililibu i lumata'afufu Yaubada i subiai i vo,

¹⁷'Yama 'Aueva Yaubada Toketokeotogimu, basenadiotoga wata 'asiau 'u miamia.

'A vekaiwa bwaikina 'waimuye fai yamu toketokena 'wainega 'u velamu tomia fwayafwaya 'u na veveimeyedi.

¹⁸Basenadi tomia fwayafwaya 'awalawa tulina tulina 'waidie i nuasako 'waimuye, siwe tutuya de'e yamu nuasako i na souyeni 'waidie, towafa 'u na veimeyedi 'adi tutula 'u na veledi.

^r 11:12 2 Kin 2:11 ^s 11:14-15 Ve 9:12; 11:15 1 Kol 15:24-25; Ve 19:6; Dan 7:13-14

^t 11:16 Ve 4:4,9-10 ^u 11:17-18 Ve 1:8, 20:11-13; 2 Kol 5:10

We'e yamu tofолоvavo, yamu tolu'ivonavo, yamu tomotoga bwaikidi wata siaidi, matatabudi i veve'lilibuyemuga tutula 'atumaidi 'u na veledi.

Wata tutuya de'e 'waineye fwayafwaya 'ana to'ivesako 'u na leodi."

¹⁹Wata a 'isanago abame, matakuye Yaubada yana vanuga 'eba velu'ui 'ana saiboda i sibaleni, nageneye tamu didiwaka a 'iseni. Didiwakanina nageneye Yaubada yana Veakutagona tomotoga 'waidie 'ana buki i 'eno'eno. Bola a 'i'isanago nika tomuyoana i kikianamali wata i dududuya, butu'ai bwaikidi a nogaidi, yoyoyo i yue wata 'wei mwadodoudi bani'odi aisi i avuta.

Vavine wata wayo'o kasikasisina.

12 ¹Wata a 'isanago abame tamu 'eba 'isa i souyeni nuaku i 'ewai. A 'iseni tamu vavine, 'adi kaleko mataududulina bani'odi inala, 'unu'unudie kunabanaba 'ubwana 12 taiadi, yadi veimea 'ana 'eba 'isa, wata weta'i tabwaneye i tovofovoi. ²A 'isedi sai'afoga i na venatuna bega i 'we'we'wela bwaikina fai i veveviga.

³Wata abame tamu 'eba 'isa i souyeni. Tamu tomotoga a 'iseni bani'odi wayo'o yamoyamoina, bwaikina wata kasikasisina. 'Unu'ununa 7 'waidie kunabanaba 7 toveimea 'adi vaigavu, we'e alana 10 'edu'edudie. ⁴Giunega 'ubwana fuedi i sita'idi i obu fwayefwayeye. 'Ubwana vi'ai 'ailuga 'atumaidi i 'eno'enovi, vi'ai 'aitamogana i nikedi. Vavinenidi sai'afoga i na venatunaga liviladie wayo'onina i tovofovoi nuanuana natudi i na 'ani-matayo'oi. ⁵I venatuna kwamana iavetana i tubuga, kumanina ma yana toketokena tomotoga 'adi 'aila'a tulina tulina i na veveimeyedi. Wayo'onina igodi kwamananina i da ovai nika tamu tomotoga i sieloeloi i vagavaia i naweni Yaubada 'waineye, kumanina yana 'eba miabui 'ai'aiwabuna 'waineye i miamia. ⁶Vavine i dega i nago sali'avu'avuyeye fai bei Yaubada yadi 'eba mia basenadi i 'idewai. Bei i na miamia i na 'i'isave'avinidi 'aiata 1,260 nagedie.

⁷Vavinenidi i dega i nago, mulieta gavia i velamu abame. Tamu anelose bwaikina 'ana wagava Maikeli ma yana anelose, wata tomotoganina bani'odi wayo'o kasikasisina ma yana 'aila'a" taiadi i vetalaga. ⁸⁻⁹xMaikeli ma yana anelose i vetoketoke we'e wayo'onina ma yana 'aila'a Yaubada kebu i da tauyedi bega i na miamia abame, begaidi i sogiedi i obuma fwayefwayeye. Wayo'onina kumanina basenadi 'o'olo tuatuaia, 'ana wagava Diabolo 'alo Seitani, tomia fwayafwaya matatabudi i vevekaliedi.

¹⁰yA 'iseni i obu fwayefwayeye, nika bona bwaikina a nogai abamega i vonavona i vo,

v 12:7 Iud 1:9 w 12:7 'Ana mogitana wayo'o kasikasisina ma yana anelose.

x 12:9 Nag 3:1; Ve 20:2-3 y 12:10 Iob 1:9-11; Sek 3:1

'Asiau Yaubada nani matatabuna 'waidie i vetoketoke, i 'ita'ita'i, wata i veveimea. Yaubada 'ana Venua'ivina yana toketokena i veleni taiadi i veveimea. I vetoketokega fai Seitani i sogieni abamega. Kumanina i tovtovoi Yaubada mataneye lovana wata 'aiata edavo tovtumagana i vevevitadi sakona faifaidi. ¹¹Edavonidi Seitani 'waineye i vetoketoke Keliso dayaginega, taunina Yaubada yana Sifi Siaina, yawaina i tauyeni i wafa tomtoga faifaidi. Wata edavo i vetoketoke fai Yaubada yana Vona tonovina i lu'ivona tomtoga 'waidie, kebu yawaidi faifaidi i da nuanua, taunidi i tauyedi wafa 'waineye. ¹²'Omi tomia abama 'wa na sosoana fai Yaubada i vetoketoke, we'e 'omi fwayafwaya wata eyaga 'adi tomia, nuakalikalimi vita 'wa na veluagadi fai Seitani i obuwa nuanuana vita bwaikina i na velemini. I nuasako-'afo'afo fai i 'asetai yana tutuya 'ale'usana."

¹³Tomotoganina wayo'o bani'odi i obuma fwayefwayeye i 'asetai Yaubada i vetoketoke begaidi vavine i sogiedi, kumanidi kwamana iavetana i venatuneni. ¹⁴Igodi i da 'ive'avinidi siwe Yaubada manubutu bwaikina fafena 'adi 'ailuga vavine i veledi bega i dega i nago yadi 'eba mia nonogineye sali'avu'avu 'waineye, bei malamala 'aitonu wata sai'afo nagedie i na 'ita'ita'iedi wayo'o 'wainega wata i na 'li'save'avinidi. ¹⁵Wayo'o 'awana i o'ei ufa bwaikina i souyeni nuanuana vavine i na bewedi i na wafa. ¹⁶Igodi i da luvewafadi siwe fwayafwaya vavine i 'ivaisedi i 'anifuai ufanina matatabuna i susula. ¹⁷^zWayo'onina i nuasako bwaikina vavine 'waidie bega i nago natudiavo 'ifwaidi taiadi i na vetalaga, kumanidiavo Yaubada yana Vona i vevematayakeyakediga wata Iesu faifaina i lulu'ivona. ¹⁸Bega wayo'o i nago balebaleye bei i tovtovoi i lulukamata.

'Aisaya kasikasisina malavetayega.

13 ¹"Tomotoga wayo'o bani'odi i tovi-vagata i tovtovoi a 'li'isanago nika tamu tomtoga a 'iseni 'aisaya kasikasisina bani'odi, malavetayega i lakama. A 'iseniga 'unu'ununa 7, alana 'edu'edudie 10, we'e alanidi 'aitamogana 'aitamogana 'waidie kunabanaba toveimea 'adi vaigavu. 'Unu'ununidi 'aitamogana 'aitamogana 'waidie wagava sakoidi i kilumidi, wagavanidi Yaubada i awavesakoyeni. ²Tomotoganina 'ana 'isa'isa sifu walawala'ai kasikasisina 'ana wagava lefadi, 'ageni 'wa da vo tamu 'aisaya sakoina 'ana wagava bea, we'e 'awana bwaikina laioni 'awana bani'odi. Tomotoga bani'odi wayo'o yana toketokena, yana veimea wata yana 'eba miabui 'ai'aiwabuna i 'anivelenedi tomtoganina malavetayega 'waineye. ³We'e tamu 'unu'ununa 'waineye bwaya a 'iseni 'wa da vo basenadi i da wafa wata i da yawasa. Tomia fwayafwaya

^z 12:17 1 Fit 5:8 ^a 13:1 Ve 17:3,7,12

matatabuna nuadi i voganidi yana yawasa-vaitugana faifaina begaidi yana nuanua i vematayakeyakedi. ⁴Wata tomotoga fue di ma yadi subia i 'odu'odu wayo'o 'waineye fai yana veimea i 'aniveleneni tomotoganina malavetayega 'waineye. Siwe wata tomotoganina malavetayega 'waineye i 'odu'odu i vonavona i vo, Tomogo de'e toketokeotogina, kebu tamu aitoi 'ana fata taiadi i na vetalaga bega i na vetoketoke.”

⁵Weta'i 42 nagedie tomotoganina ma yana veimea taunina i awa'ai'aia we'e Yaubada 'waineye i awadamana siwe Yaubada kebu i da talabodeniga i tauyeni. ⁶Nuanuana Yaubada i na uvi'agali bega ma yana nuasako i vovona-awadamana Yaubada 'waineye, yana 'eba mia faifaina i vona, wata tomotoganidi taiadi i miamianiga abame, 'waidie i vovona-awadamana. ⁷^bYaubada i tauyeni Iesu yana tomotoga taiadi i vetalaga 'waidie i vetoketoke, wata ma yana veimea tomotoga i miamiani 'awalawa 'aitamogana 'aitamogana 'waidie, bonadi tulina tulina, i veveimeyedi. ⁸^cTomotoga fue di i na 'odu'odu tomotoganina malavetayega 'waineye, we'e Iesu yana tomotoga mogitana i na baila. Basenadi Yaubada fwayafwaya kebu i da 'idewaiga, Iesu yana tomotoganidi 'adi wagava i kilumidi yana buki 'waineye bega mia 'atumaina wata miamia-vagaina i na veluagai, we'e kumanidiavo i na 'odu'oduga 'adi wagava kebu i da kilumidiga. Bukinina Yaubada yana Sifi Siaina yana buki, kumanina basenadi tomotoga i luvewafai.

⁹Ekwavo a na vonemi, nuami i na 'ivina-'atumai bega de'e vonanina 'wa na 'asetai. ¹⁰^d'Ai'edi aitoi Yaubada i na tauyeni bega i na luku vanuga 'eba yogona 'waineye Keliso faifaina, mogitana i na luku, wata 'ai'edi aitoi Yaubada i na tauyeni bega Keliso faifaina i na luvewafai kefatayega, mogitana i na wafa. Begaidi 'omi Iesu yana tomotoga, 'wa na tokemaigemi, ma yami vetumagana 'wa na tovoovoi fa'alina vitanidi 'waidie.

'Aisaya kasikasisina fwayafwayayega.

¹¹Wata a 'isanago nika tamu tomotoga a 'iseni fwayafwayayega i souyeni 'aisaya kasikasisina bani'odi. 'Edu'eduneye alana 'ailuga siaidi bani'odi sifi natudi alana, we'e bonana kasikasisina wayo'o bani'odi. ¹²Tomotoganina malavetayega 'aisaya kasikasisina bani'odi, kumanina basenadi i wafa wata i yawasa, yana veimea matatabuna i 'anivelenedi tomotoga fwayafwayayega 'waineye i vo, Nuanuaku 'u na veimea bega tomia fwayafwaya matatabudi i na 'odu'odu 'waikuye.” ¹³^eTomotoganina fwayafwayayega 'eba nua'ewa wata 'eba nuavogana i 'idewadi tomotoga matadie, wata i vona 'ai-'ala'alata i obuma abamega. ¹⁴Tomotoga fwayafwayayega tugusanidi toketokedi i 'idewadi tomotoga malavetayega 'ana wagavayega, naninidi 'waidiega tomia

^b 13:7 Ve 11:7 ^c 13:8 Ve 3:5 ^d 13:10 Ve 14:12 ^e 13:13-14 Mad 24:24

fwayafwaya i vekaliedi. Wata tomotoga i vonedi i vo, Kumaea 'wa na 'idewai tomotoga malavetayega 'ana 'isa'isa bani'odi, kumanina basenadi i wafa i yawasa, ma yami ve'ililibu 'waineye 'wa na 'odu'odu." ¹⁵Kumaeana i 'idewa'a'avaina tomotoganina fwayafwayayega ma yana veimea i vona nika kumaea yawaina i souyeni. Kumaeana 'ana fata i na welava, we'e egavo i baila, kebu nuanuadi i na 'odu'odu 'waineye i luwefadi. ¹⁶Tomotoganina fwayafwayayega tomotoga matatabudi i lukakadedi 'adi tugusa i na 'ewadi, i na yatodi 'adi 'atagie 'alo debadie, tomotoga bwaikidi wata tomotoga siaidi, 'ai'aiwabu wata wekowekoma, tofolova-maimaiga wata 'adi toveimeavo, matatabudi tugusa i 'ewa. ¹⁷^fAi'edi egavo kebu ma 'adi tugusaga kebu 'adi fata kukua wata 'ani'ani i na kimwane 'alo i na vekimwane. Tugusanina tomotoga 'aisaya kasikasisina bani'odi 'ana wagava 'alo 'ana wagava 'ana naba.

¹⁸Ekwavo, ma yami 'aseta 'wa na vena'ivina. Tomotoganina 'aisaya kasikasisina bani'odi, 'ana wagava 'ana naba fio bani'odi, side nabanina 666. Egavo ma yadi 'aseta 'adi fata fionina i na nua'ivineni nika wagavaotoga i na veluagai, wagavanina 'aisayanina 'ana wagava siwe 'ana nogaya 'wa da vo tamu tomogo 'ana wagava.

Tomotoganidi 'ita'ita'i 'akonadi i veluagai yadi lei.

14 ¹⁸Wata a 'isanago, Yaubada yana Sifi Siaina a 'iseni tomotoga 144,000 taiadi i tovofovi 'Oya Saioni tabwaneye. Tomotoganidi debadie Sifinina 'ana wagava wata Tamana 'ana wagava i kilumidi. ²^hBona bwaikina a nogai abamega kuvakuvala 'alo tomuyoana butu'aina bani'odi. Bonanina 'ana nogaya wata bani'odi 'aila'a bwaikina yadi gita i lalauinava. ³^fTomotoganidi 144,000 i tovoi maigidi i nago 'eba miabui 'ai'aiwabuna 'waineye, nani ma yawaidi toketokedi 4 wata to'edakumeta 'au'auveadi 'waidie, tamu lei 'ivauna 'ana nogaya 'atumaina i leieni. Leinina kebu tamu aitoi 'ana fata i na 'asetai, 'aisedi tomotoga 144,000 i 'asetai. Kumanidiavo 'akonadi Yaubada i tuveobudi i maia fwayafwaya 'ana sakona 'wainega. ⁴⁻⁵^jTomotoganidi yadi sauluva 'atumai'avadi Yaubada mataneye, kebu i da baileni bega i da 'odu'odu yaubada-vekavekali 'waidie, yadi sauluvinina 'wa da vo tomotoga yadi vevinevo kebu i da bailedi bega i da ve'avula-'avo'avovo. Ava'aibe bei Yaubada yana Sifi Siaina i nunagoga, tomotoganidi i yoyogo'wai'waili. Tomia fwayafwaya 'waidiega tomotoganidi Yaubada i tuveobudi bani'odi 'ayavau, Yaubada wata yana Sifi Siaina 'adi 'anivelena. Kebu tamu tutuya 'awadiiega vekali i da souyedi wata kebu tamu 'adi awavesako.

Anelose 'adi 'aitonu.

⁶Wata a 'isanago tamu anelose a 'iseni Iesu Valana 'Atumaina wata Miamia-vagina, tabwaneamo i yavegeni i mimaieni. I

f 13:17 Ve 14:9-11 g 14:1 Ve 3:12 h 14:2 Ve 1:15 i 14:3 Ve 7:4 j 14:4 Iem 1:18

yavegeni i mimaieniga tomia fwayafwaya matatabudi 'waidie i na lu'ivoneyeni. Tomotoganidi 'awalawa 'aitamogana 'aitamogana 'waidie, bonadi wata 'adi 'aila'a tulina tulina. ⁷Anelosenina i toke i vegole i vo, Yaubada toketokena 'wa na kololoyeni wata 'wa na subisubiai, fai yana tutuya 'akonadi i souyeni bega tomotoga i na veimeyedi vematavuloga i na veluagai. I lubwainemi 'wa na 'odu'odu 'waineye, taunina abama, fwayafwaya, eyaga wata ufa-luluvuala 'adi to'idewadewa.”

⁸Wata tamu anelose 'ana veluga i mai i vegole i vo, Babiloni 'atamana bwaikina i da kual i kual. 'Atamananina 'ana sauluva sakoidi wata bunu 'ana nuanua sakoidi 'waidiega tomotoga 'adi 'aila'a tulina tulina nuadi i 'ewadi i yo'edi i luku. I lukuga i sakona bani'odi tamu vavine nuanuadi tamu tomogo, nagami oine toketokena i na veyemuya mulieta nuana i na lugaugauya nika taiadi i na sakona.”

⁹Wata tamu anelose 'ana vetonu i mai i toke i vegole i vo, 'Ai'edi egavo i na 'odu'odu tomotoga malavetayega 'alo 'ana kumaea 'waidie wata 'adi tugusa debadie 'alo nimadie, Yaubada yana nuasako bwaikina i na veluagai. ¹⁰Yana nuasakonina kebu sidibidibiga, nuasako mogitana tomotoganidi i 'odu'oduga i na veluagai, 'wa da vo bani'odi Yaubada yana oine toketokena ma vedina tosakonanidi i da veyemudi i da nikedi. Tomotoganidi i 'odu'oduga veviga bwaikina i na veluagai manufagila wata 'ai-'ala'alata nagedie anelose magemagetadi wata Yaubada yana Sifi Siaina matadie. ¹¹'Ainina 'wainega veviga i veveluagai lufwana i tovi-vagata, bega egavo tomotoga malavetayega wata 'ana kumaea 'waidie i 'odu'oduga, wata 'ana wagava 'ana tugusa 'waidie, kebu tamu sai'afo 'aivaita i na veluagai, lovana wata 'aiata bei i na veveviga.”

¹²Ekwavo, 'omi Yaubada yana tomotoga, yana Vona 'wa vevematayakeyakedi wata yami vetumagana 'wa yato-vagaseni Iesu 'waineye. Mogitana veviganidi i na souyedi siwe i lubwainemi ma yami tokemaiga 'wa na tovoi fa'alina naninidi sakoidi 'waidiega.

¹³Anelosenidi yadi vona i 'a'ava, mulieta abamega tamu bona a nogai i vonavona i vo, Side bani'odi 'u na kilumedi 'u na vo, Tutuya de'e i na nagoga egavo i na folofolova 'Auvea faifaina i na wafaga 'eba sosoana 'waidie.” 'Anu'anunu 'Atumaina wata yana nuanua bani'odi i vesala i vo, Vona mogitana, i na sosoanaga, folova vitadi 'waidiega i na veawai fai abame tomotoga fueidi yadi folovanidi i na 'asetadi wata 'adi tutula i na veluagadi Yaubada 'wainega.”

^k 14:8 Ve 18:2-3 ^l 14:9-10 Ve 13:11-17, 19:20, 20:10,15, 21:8 ^m 14:12 Ve 13:10

ⁿ 14:13 Ibu 4:10

Anelose tomia fwayafwaya i nawedi Yaubada 'waineye.

¹⁴Wata a 'isanago waowa 'avu'avuna a 'iseni. Waowanina tabwaneye tamu tomotoga i miabui 'ana 'isa'isa kumanina i vetomotogaotoga,^p 'unu'ununeye toveimea 'adi vaigavu golida, we'e nimaneye 'ilama lu'obwana wata nigonigona. ¹⁵^qAbame tamu anelose i souyeni vanuga 'eba velu'ui 'wainega i toke i vegole tomotoganina waowa tabwaneye i miabuiga 'waineye i vo, Yamu 'ilamanina lu'obwana 'wainega nani fuei fwayefwayeye 'akonadi i kumaga 'u na kinidabadi fai 'ana tutuya i souyeni." ¹⁶Tomotoganina waowa tabwaneye i miabuiga i mai tomotoga fuei i vagavaidi 'wa da vo bani'odi i da kumaga yana 'ilamayega i da kinidabadi.

¹⁷Wata abame tamu anelose a 'iseni vanuga 'eba velu'ui 'wainega i souyeni, taunina wata ma yana 'ilama lu'obwana wata nigonigona.

¹⁸Wata tamu anelose a 'iseni 'eba velomu 'wainega i souyeni, kumanina 'eba velomunina 'ana 'ai-'ala'alata 'ana to'isave'avina. I toke i vegole tomotoganina ma yana 'ilama nigonigona 'waineye i vo, Fwayefwayeye kalefa 'akonadi i kumaga, 'u na kinikadidi oine faifaina." ¹⁹Bega tomotoganina ma yana 'ilama kalefa i kinikadidi i 'ewadi i nawedi 'eba vatanitani nageneye i vedodogidi. 'Eba vatanitaninina vona-awatabai Yaubada yana nuasako faifaina, tomia fwayafwaya i na vematavulogidi. ²⁰'Eba vatanitaninina 'atamana bwaikina lilivaneye bei kalefa i vatanitanidi nika dayaga i sousouyeni 'wa da vo ufa nununagona, i taina i nago manamanaweotogina me Guliki yadi 'etowava 1,600 sitedia,^s 'ana veawana igodi ta simwanuda.

Anelose 7 vita i 'ewadi i na tawedi fwayefwayeye.

15 ¹'Dayaga a 'iseni i 'a'avana, mulieta 'awaie ava'ai i na souyeniga 'ana 'isa'isa i veku, 'ana 'isa'isanina 'eba nuavogana wata nani bwaikina. Anelose 7 nimadie nani sakoidi 7 a 'isedi 'waidiega tomia fwayafwaya vematavuloga i na veluagai. Tutuyanina naninidi sakoidi i na obu fwayefwayeye tomotoga i na nikedina bei Yaubada yana nuasako 'ana 'eba ve'a'ava, kebu wata tamu nani sakoina i na sousouyeni.

²Wata a 'isanago eyaga niwalova 'atumaiotogina a 'iseni, 'aninamanamalina kilifou bani'odi, nageneye 'ai-'ala'alata. Eyaganina lilivaneye tomotoga fuei a 'isedi i tovoivoi, kumanidiavo i vetoketoke tomotoga malavetayega, 'ana kumaea, wata tomotoganina 'ana wagava 'ana naba fio 'waidie. Tomotoganidi nimadie ma yadi 'eba lauinava gita

o 14:14 Dan 3:17; Ve 1:13 p 14:14 Tomotoganina 'asa'aiana Iesu Keliso.

q 14:15,18 Mad 13:36-40 r 14:19 Ve 19:15 s 14:20 'Ana vemanawe bani'odi 300 kilomita. t 15:1 Ve 15:6-7

Yaubada i veledi. ³“Matatabudi i leilei, leinina Yaubada yana tofolova Mosese wata Yaubada yana Sifi Siaina 'waidiega. Leinina side bani'odi.

'Auvea Yaubada, 'omu toketokeotogimu,
Naninidi 'u 'i'idewadiga bwaikidi wata 'eba nuavogana.
'Awalawa 'aitamogana 'aitamogana 'u veveimeyedi,
Yamu sauluva 'atumaidi wata tonovidi.

⁴Tomotoga matatabudi ma yadi kololo i na ve'ililibuyemu,
Ma yadi subia yamu toketokena i na lulu'ivoneyeni,
Fai 'omu 'aiseotogimu magemagetamu.

Tomotoga 'aila'a tulina tulina i na maia i na 'odu'odu 'waimuye,
Fai tomotoga fueidi yamu veimea tonovidi i 'isedi.

⁵'Lei i 'a'avana a 'isanago nika Yaubada yana vanuga abame i sibaleni, nageneye tutudaba tabutabuna a 'iseni, Yaubada yana 'eba mia. ⁶We'e anelose ⁷vanuganina 'wainega i souyedi, nani sakoidi ⁷i mimaiedi, naninidi tomia fwayafwaya 'adi 'eba vematavuloga. 'Adi kaleko mataududulidi wata vunavunagidi, 'afaudiamo bulava golida i nago. ⁷Nani ma yawaidi toketokedi ⁴, 'waidiega tamu iadi 'aivoe ⁷i 'ewadi, anelose 'adi ⁷i veledi. 'Aivoenidi golida, nagedie Yaubada miamia-vagaina yana nuasako i veadagidi. ⁸I veledina nika Yaubada yana toketokena wata yana mageta vanuga 'eba velu'ui i susuli bani'odi lufwa bega kebu tamu aitoi 'ana fata i na luku, nagami anelose ⁷vita sakoidi ⁷i na tawedi i na obu fwayefwayeye mulieta i na luku.

Yaubada yana nuasako ma 'aivoedi 7.

16 ¹“Yaubada yana toketokena wata yana mageta vanuga 'eba velu'ui matatabuna i susuli i 'a'avana, mulieta bona bwaikina a nogai vanuga 'eba velu'uinina 'wainega i toke i vonavona anelose ⁷'waidie i vo, 'Wa na nagoi nani sakoidi ma 'aivoedi ⁷'wa na 'iveiwagedi bega Yaubada yana nuasako i na souyeni tomia fwayafwaya 'waidie.”

²“Tamu anelose nani sakoina ma 'aivoena i 'iveiwageni fwayefwayeye bonu sakoiotogidi i souyedi tomotoga fueidi 'waidie i veveviga bwaikina, tomotoganidi kumanidiavo nimadie 'alo debadie tomotoga malavetayega 'ana tugusa, wata tomotoganidi 'ana kumaea 'waineye i 'odu'oduga 'waidie.

³“I 'a'avana anelose 'ana veluga nani sakoina ma 'aivoena i 'iveiwageni eyage, eyaga matatabuna 'wa da vo tomotoga wafawafana dayagina ufaufana, begaidi 'aisaya eyage wata naninidi bei i 'eno'enoviga matatabudi i ve'alawafawafa.

⁴Anelose 'ana vetonu nani sakoina ma 'aivoena i 'iveiwageni ufa'ai wata ufa-luluvuala i vedayaga. ⁵Anelose tamu, ufa matatabuna 'adi to'isave'avina i vona i vo,

^u 15:3 VeL 32:3-4; Ve 16:7 ^v 15:5 Ibu 9:3 ^w 16:1 Ve 16:17; Sef 3:8 ^x 16:2 Sou 9:10;
Ve 13:11-17 ^y 16:3 Sou 7:17-21

Yaubada 'omu magemagetamu 'omu basenadi wata 'asiau 'u miamia. 'U veimea tomia fwayafwaya vematavuloga i veluagai, veimeanina tonovina wata i lubwaineni bani'odi.

^{6z}Taunidi yamu tomotoga wata yamu tolu'ivonavo i nikedi i 'ivedayagidi we'e 'omu ufa i vedayaga to'ainikenidi 'u veledi i na yemu. I lubwaineni yadi sakona 'ana tutula.”

^{7a}Wata tamu bona a nogai 'eba velomuyega i vonavona i vo, 'Auvea Yaubada toketokeotogimu, vona mogitana yamu veimea 'atumaidi wata tonovidi.”

⁸I vona'a'ava, mulieta anelose 'ana ve-4 nani sakoina ma 'aivoena i 'iveiwageni inala 'waineye, bega Yaubada inala yana toketokena i 'imoso'iени tomotoga i 'alakualidi. ^{9b}Yauyautanina tomotoga i 'alaidiga i 'alavekamogaogalidi Yaubada i awavesakoyeni fai i 'asetai vitanidi i souyedi yana veimea 'wainega. I 'asetai 'adi vematavuloga siwe kebu i da vo, 'A na nuavilama Yaubada toketokena 'a na subiai.”

^{10c}Anelose 'ana ve-5 nani sakoina ma 'aivoena i 'iveiwageni tomotoga kasikasisina malavetayega yana 'eba miabui 'ai'aiwabuna 'waineye, nika yana 'eba veimea matatabuna i dudubali. Tomotoga maigidi i yuyudi fai veviga bwaikina i veluagai. ¹¹Yaubada abame i awavesakoyeni yadi veviga wata yadi bonu sakoitogidi faifaidi siwe wata kebu yadi sauluva sakoidi i da baileidiga.

¹²Anelose 'ana ve-6 nani sakoina ma 'aivoena i 'iveiwageni ufa bwaikina 'ana wagava Iufiletisi 'waineye i lala. I lalaga bega 'ana fata toveimea bwaikidi ma yadi tolugaviavo inala yana 'eba laka 'wainega i na maia. ^{13d}A 'isanago yaiaina sakoidi 'adi 'aitonu talatala bani'odi a 'isedi. Yaiaina tamu i souyeni malaveta 'ana tomotoga sakoina 'awanega, tamu, tolu'ivona-vekavekali^e 'awanega, wata tamu i souyeni tomotoga kasikasisina 'awanega, kumanina wayo'o 'ana 'isa'isa bani'odi. ^{14f}Yaiainanidi 'adi 'aitonu i souyedi 'eba nuavogana wata 'eba nua'ewa i 'i'idewadi toveimea bwaikidi matadie. Toveimeanidi 'awalawa 'aitamogana 'aitamogana 'waidiega nuadi i 'ewadi bega i na va'auta 'Auvea taiadi i na vetalaga 'aiatanina Yaubada toketokena i venna'ivineniga 'waineye.

^{15g}Yau Iesu a na vonemi. 'Wa na 'isa'isa 'akonadi a viwai. Yaku wainina a na vaimwaimwamo a na souyeku kebu nuanuaku a na veyawailovogimi. Egavo i na 'isa'isa wata i na lulukamata 'eba sosoana 'waidie. I lubwainedi yadi sauluva 'atumaidi i na 'i'isave'avinidi 'wa da vo

^z 16:6 Ve 17:6, 18:24 ^a 16:7 Ve 19:2 ^b 16:9 Ve 9:20-21 ^c 16:10 Sou 10:22

^d 16:13 Ve 13:11-15; Ve 19:20 ^e 16:13 Tolu'ivona-vekavekali taunina tomotoga sakoina i souyeni fwayafwaya 'wainega. ^f 16:14 1 Tim 4:1; Ve 19:19 ^g 16:15 1 Tes 5:2; Ve 3:3; Luk 12:37-40

'adi kaleko vunavunagidi i da si'i'idi bega kebu i na vekonekone wata i na bunumayaga tomotoga matadie.”

¹⁶We'e yaiananidi toveimea bwaikidi i vonedi i va'auta tamu 'awalawa 'waineye me Diu bonadiega 'ana wagava Amagedoni.

¹⁷^hI va'autana mulieta anelose 'ana ve-7 nani sakoina ma 'aivoena i 'iveiwageni 'awasasa'aveye.ⁱ Bona bwaikina a nogai 'eba miabui 'ai'aiwabuna 'wainega. 'Eba miabuinina abame, vanuga 'eba velu'ui nageneye, i vona i vo, 'Asa'aiana, 'akonadi i 'a'ava.” ¹⁸^jI vona'a'ava nika mageta i kikianamali, bona bwaikidi, tomuyoana i dududuya, wata yoyoyo bwaikaotogina i yue. Tomotoga 'ana 'idewavau 'wainega i maiga 'asiau kebu tamu yoyoyo bani'odi i da yue. ¹⁹^kAtamana bwaikina i si'idi-tonuyeni wata 'atamana matatabudi 'awalawa 'aitamogana 'aitamogana 'waidie i 'ivesakodi. Naninidi sakoidi 'atamana bwaikina Babiloni 'ana tomia i 'idewadiga Yaubada kebu nuana i da fani, ma yana nuasako bwaikina vita bwaikina i veledi, 'wa da vo yana oine toketokena 'wainega i da veyemudi bega i da nikedi. ²⁰Imula matatabudi i savovola, 'oya i velaube'u. ²¹^lWei mwadodoudi bani'odi aisi, 'adi vita 'wa da vo maidoga 'aitamogana 'ana vita^m i 'anita'idi tomotoga i nikedi. Vitanidi faifaidi tomotoga Yaubada i awavesakoyeni fai sakoiotogidi.

Vavine toalagogona 'aisaya yamoyamoina kwavuneye.

17 ¹Vita 'ana ve-7 i 'a'avana, mulieta anelose 7, kumanidiavo nani sakoidi yadi 'aivoeyega i 'iveiwagediga fwayefwayeye, 'waidiega tamu i mai 'waikuye i voneku i vo, 'U mai ta na nago a na vemu tamu 'atamana bwaikina ufa fueidi lilivadie, 'awaie vita i na veluagai yana sakona faifaidi. 'Atamananina bani'odi tamu vavine toalagogona ma 'ana 'asete, tomotoga fueidi nuadi i 'ewadi bega taiadi i sakosakona. ²ⁿToveimea fueidi kini bani'odi toalagogonanina taiadi i sakosakona, we'e tomia fwayafwaya fueidi nuadi i 'ewadi yana sauluva sakoidi 'waidiega 'wa da vo bani'odi ufa toketokena i da veyemudi nuadi i da lugaugaudi.”

³^oAnu'anunu 'Atumaina mogitana i ageku bega anelose i naweku sali'avu'avuye. Bei tamu vavine a 'iseni 'aisaya yamoyamoina kwavuneye i miabui i miamia. 'Aisayanina 'unu'ununa 7 wata 'edu'edudie alana 10, we'e tomogona matatabuna wagava 'ana loi, wagavanidi Yaubada 'ana awavesako. ⁴Vavinenina 'ana kaleko yamoyamoina wata bakabakana 'ai'aiwabu 'adi kaleko bani'odi, 'ana vaigavu golida, kileu wata bida 'aninamanamalidi 'adi tutula bwaikidi. Nimaneye tamu vedi golida, vedinina nageneye nani sakoidi fueidi faifaidi Yaubada i nunuasako,

^h 16:17 Ve 16:1 i 16:17 Me Diu yadi 'asete, yaiana yadi 'eba mia 'awasasa'aveye.
^j 16:18 Ve 8:5 ^k 16:19 Ve 14:8-10 ^l 16:21 Sou 9:24; Ve 16:9,11 ^m 16:21 'Ana mogitana 'ana vita bani'odi 50 kilogalamu. ⁿ 17:2 Ve 18:3 ^o 17:3 Ve 13:1

bani'odi yana sauluva sakoidi iaveta taiadi. ⁵Debaneye 'ana wagava i kilumi 'ana 'asete vitana bani'odi yana fio. Wagavanina side bani'odi, Babiloni 'atamana bwaikina.

Kumanina vevine tolagogona fuedi wata nani sakoidi matatabudi fwayefwayeye inadi.

⁶Vavinenina a 'iseniga 'ana 'isa'isa ufa toketokena i yemu nuana i lugaugauya. Ufanina Yaubada yana tomotoga wata tomotoganidi i tokemaiga Iesu faifaina dayagidi. Vavinenina a 'iseni nuaku i vogana-'afo'afo. ⁷Anelose i velutolieku i vo, Awale nuamu i vogani? Vavinenina wata 'aisayanina 'unu'ununa ⁷ wata alana 'edu'edudie ¹⁰, kwavuneye i miabuiga, 'adi 'asete fio bani'odi a na veifufuyedi 'u na nogai.

⁸'Aisayanina yamoyamoina tamu tomotoga, basenadi ma yawaina siwe 'akonadi i wafa, sai'afoga i na souyeni Vatu'aiega yaiaina yadi 'eba mia 'wainega, tomotoga fuedi i na 'iseni mulieta i na wafaga wafa-vagata. Basenadi Yaubada kebu fwayafwaya i da 'idewaiga tomotoga 'ifwaidi 'adi wagava i kilumidi mia-vagata 'ana buki 'waineye. We'e kumanidiavo kebu 'adi wagava i da kilumidiga, tutuyanina tomotoganina Vatu'aiega i na souyeni nuadi i na voganidi fai i na 'asetai nagami ma yawaina, siwe i wafa wata i yawasa.

⁹Ai'edi aitoi ma yana 'asete, fio de'e i na 'asetai. 'Unu'ununa ⁷ 'ana 'asete 'oya ⁷ tabwadie 'atamana 'aitamogana i 'idewai, 'wa da vo vavinenina bei i da miabui. Wata 'unu'ununanidi ⁷ tamu 'ana 'asete, toveimea bwaikidi ⁷. ¹⁰Toveimeanidi 'waidiega 'akonadi ⁵ yadi veimea i 'a'ava, 'ana ve-6 'asiau i veveimea, 'ana ve-7 sai'afoga i na souyeni siwe kebu tutuya manamanawenaga wata i na 'a'ava. ¹¹Tomotoganina 'aisaya yamoyamoina bani'odi ⁷-nidi 'waidiega, i be'u wata i na tovoi-vaitugana nika toveimea bwaikina 'ana ve-8. Taunina kumanina tomotoga fuedi i na 'iseni, mulieta i na wafaotoga.

¹²Ala ¹⁰ 'u 'isediga 'ifwaidi toveimea bwaikidi matatabudi ¹⁰ bola kebu yadi veimea i da velamu. 'Awaie i na veveimea 'aisaya yamoyamoina taiadi siwe kebu tutuya manamanawenaga. ¹³Toveimeanidi ¹⁰ matatabudi yadi nuanua i vesala, yadi toketokena wata yadi veimea i na 'anivelenedi tomotoganina 'aisaya yamoyamoina bani'odi 'waineye. ¹⁴'Matatabudi Yaubada yana Sifi Siaina taiadi i na vetalaga siwe Sifi Siaina wata yana tomotoga i na vetoketoke i na leodi fai taunina to'edakumetavo matatabudi yadi To'edakumeta Bwaikina wata toveimea bwaikidi 'adi Toveimea. Yana tomotoganidi basenadi i venua'ivinediga i goledi i nagoi 'waineye, taunidi totokemaiga vita fuedi 'waidie."

¹⁵Wata anelose i voneku i vo, Ufanidi 'u 'isediga bei vavine i miabuiga 'adi 'asete tomotoga matatabudi bonadi tulina tulina 'awalawa 'aitamogana

'aitamogana 'waidiega. ¹⁶Ala 10 'u 'isediga, kumanidiavo toveimea bwaikidi 10 wata tomotoganina 'aisaya bani'odi, matatabudi vavine toalagogona i na vedumwe'ai'aieni taiadi i na vetalaga nani matatabuna 'waineye i 'eno'enoviga i na eloi we'e konekonena i na miamia. I na eloina mulieta tomogona i na 'ania we'e luluna i na kabunidi 'aie. ¹⁷Vavinenina i na 'ivekokoviga fai Yaubada nuanuananina i veledi, bega yadi nuanua 'aitamogana 'wainega toveimeanidi 10 yadi toketokena i na 'anivelenedi tomotoganina 'aisaya yamoyamoina bani'odi 'waineye, bega i na veveimea i na nagoga nika Yaubada yana vona 'adi mogitana i na souyedi.

¹⁸Side bani'odi. Vavine 'u 'iseniga 'ana 'aseta 'atamananina bwaikina toveimea bwaikidi matatabudi i veveimeyedi.”

Yaubada me Babiloni i leodi.

18 ¹Vavine a 'iseni 'ana 'aseta kumanina 'atamana Babiloni, mulieta wata a 'isanago tamu anelose a 'iseni abamega i obuobuma. Basenadi Yaubada veimea bwaikina i veleni bega i 'awaiaia fwayafwaya matatabuna i magetai. ²I toke i vegole ava'ai 'awaie i na souyeniga faifaina i vo,

Babiloni 'atamana bwaikina i da kual i kual.

Nani sakoidi i luvili bani'odi yaiaina, yalua maigikolokolodi wata manuga sakoidi.

³I kualiga fai fwayafwaya 'ana toveimea bwaikidi yadi tomotoga fue di taiadi nuadi i 'ewadi i nagoi 'waineye, i vevesauluva sakoina wata yaubada-vekavekali 'waidie i 'odu'odu, 'wa da vo bani'odi vavine ufa toketokena i da veledi taiadi i da sakona.

We'e fwayafwaya 'ana nuanua 'waineye bwaikina nuanuana kukua fue di, begaidi tomotoga fue di yadi kukua i vevekimwaneyedi 'waineye bega mani bwaikina i veveluagadi.”

⁴Wata tamu bona a nogai abamega i vonavona 'atamananina faifaina i vo,

Yaku tomotoga, 'wa na souyemi 'atamananina 'wainega, vavinenina 'wa na baileni kebu 'wa na sakosakona taunina bani'odi.

Kebu nuanuaku 'ana vematavulogayega 'omi wata a na luvematavulogimi.

⁵Mogitana vematavuloga i na veluagai fai yana sakona fueotogidi i 'udili i laka abame, Yaubada i nuanuanidi.”

⁶Wata yana anelose i vona i vo,

'Atamana Babiloni vavine toalagogona bani'odi i vesauluva-sakoina yaku tomotoga 'waidie, 'omi wata bani'odi 'wa na vesauluva sakoina 'waineye.

Sakona 'aitamogana 'aitamogana i 'idewadiga, wata 'omi 'wa na tutula 'ailuga 'ailuga.

Nani sakoidi bani'odi ufa toketokena ma vedina i 'idewai yaku tomotoga faifaidi, 'omi wata bani'odi vedi 'ailuga 'wa na 'idewadi 'wa na veleni i na yemu, 'ana vematavuloga.

⁷Yana 'ai'aiwabu faifaidi ma yana vebaisa taunina i awa'ai'aia, 'omi vita wata nuavita 'wa na veleni yana 'ai'aiwabunidi bwaikidi 'adi fata bani'odi.

I lubwaineni vitanidi i na veluagadi fai tutuya fue di taunina i awa'ai'aia i vo, Yau kwini toketokeku, kebu vita wata nuavita a na veluagadiga 'wabu'wabulavo i veveluagadiga bani'odi.”

⁸Yana vonanina faifaina vita fue di i na veluagadi 'aiata 'aitamogana nageneye, bani'odi viga sakoina, vemogai wata loka.

'Auvea Yaubada toketokeotogina, i na veimea vematavuloga i na veluagai 'ai i na 'ala'a'avai.”

⁹“Fwayafwaya 'ana toveimea bwaikidi, kumanidiavo vavinenina taiadi i sakosakona wata i sosoana-'avo'avovo yana 'ai'aiwabu faifaidi, lufwana i na 'iseni, faifaina nuadi i na vita i na 'we'wela. ¹⁰'Ana vematavuloga faifaina i na kololo 'ani'ie i na tovoi bega i na vona i na vo,

Ieu, nuakalikalina 'atamana bwaikina wata toketokena.

'Atamana Babiloni tutuya 'ale'usaotogina nageneye vematavuloga i veluagai i 'a'ava-matayo'o.”

¹¹Tomotoganidi yadi kukua i vevekimwaneyedi bega mani bwaikina i veveluagadi wata i na nuavita i na 'we'wela i na vo, 'Atamananina bwaikina 'akonadi i 'a'ava. Kebu tamu aitoi yada kukua i na kimwanedi bola ta na vewekowekoma. ¹²Yada kukuanidi bani'odi golida, siliba, kileu wata bida 'adi tutula bwaikidi, kaleko 'avu'avudi, bakabakadi, wata yamoyamoidi 'ai'aiwabu faifaidi, welavi magaidi 'atumaidi, tomotoga 'adi dabidabi 'adi tutula bwaikidi bani'odi kavi, kofa, kainumu, kilifou wata 'aisaya bwaikidi aladi. ¹³Wata yada kukua 'ifwaidi bani'odi kavu, naia, vane, bunama magaidi 'atumaidi, oine, falawa, witi, bulumakau, sifi, osi ma yadi waka fwayafwaya, wata tomotoga ta vevekimwaneyedi bega tomotoganidi i na vetofolova-maimaiga mali tomotoga faifaidi.” ¹⁴Wata tovekimwanenidi 'ani'ieyega i na vonamo vavinenina 'waineye i na vo, Kukuanidi basenadi yamu nuanua bwaikina 'akonadi i 'a'ava, yamu 'ai'aiwabu, 'amu vaigavu wata 'amu subia matatabuna i 'a'avaotoga, kebu 'ana fata wata 'u na veluaga-vaituganidi.” ¹⁵⁻¹⁶Tomotoganidi kukua i vekimwaneyedi 'atamana Babiloni 'waineye bega mani bwaikina i veluagadi, 'ana vematavuloga faifaina i na kololo 'ani'ie i na tovoi bega i na 'we'wela i na vo,

v 18:8 Ve 11:17-18 w 18:9-10 Ve 19:2-3

Ieu, nuakalikalina 'atamana bwaikina.

Taunina i 'i'ivivigavuya kaleko 'avu'avudiega, bakabakadiega, yamoyamoidiega, golida 'wainega, kileu wata bida 'adi tutula bwaikidi 'waidiega.

¹⁷⁻¹⁸Tutuya 'ale'usana yana 'ai'aiwabunidi matatabuna i 'a'ava-matayo'o."

Wata toniwaka matatabudi, waka 'ana tofolovavo wata tomotoga i dodoga wakanidi 'waidie toyaubani taiadi 'ani'ieyega lufwana i na 'iseni ma yadi nuavita i na 'we'wela i na vo, No'o 'atamananina bwaikina, kebu tamu 'atamana bani'odiga." ¹⁹Taunidi fwayafwayayega i na ivudi, i na vemogai wata i na tainuanuai i na vo,

Ieu nuakalikalina, 'atamananina vita bwaikina i veluagai.

Toniwaka matatabudi 'atamananina 'wainega 'ai'aiwabu bwaikina i veveluagadi, siwe i simatayo'oimo yana 'ai'aiwabu i 'a'ava i sako-vagata.

²⁰"We'e 'omi tomia abama 'wa na sosoana vematavuloga i veleniga faifaina.

'Omi Yaubada yana tomotoga, yana tomata'aulelevo wata yana tolu'ivonavo, 'wa na sosoana fai 'atamananina 'wainega vita 'wa veluagai siwe 'akonadi Yaubada vematavuloga i veleni 'ami vita 'adi tutula."

²¹I 'a'avana mulieta tamu anelose toketokena kileu bwaikaotogina i silakai i toke i taweni malaveseye i vona i vo,

De'e kileunina a taweniga kebu 'wa da 'ise'iseni, wata bani'odi Babiloni 'atamana bwaikina i na toke i na leodi i na 'a'ava, kebu wata tamu aitoi i na 'ise'iseniga.

²²'Atamananina yana sosoana i na 'a'ava kebu wata tamu ava'ai bonana ta na noganogai bani'odi lauinava gitayega, 'umo wata evulega.

Wata tofolova kebu tamu ava'ai i na 'idewaiga nageneye, wata kebu 'ana fata sakoli butu'aidi ta na noganogaidi.

²³Kebu tamu mageta bei ta na 'ise'iseni, wata nagi 'ana bonabonana i na 'a'ava.

Vona mogitana 'atamananina 'ana tovekimwane matatabudi i 'edakumetaotoga tomia fwayafwaya matatabudi 'waidiega, wata 'afo'a 'wainega tomotoga fuedi i vekaliedi, siwe 'akonadi toketokenanidi matatabuna i 'a'ava.

²⁴'Atamananina Babiloni vematavuloga i veluagai fai basenadi bei Yaubada yana tomotoga wata yana tolu'ivonavo i luvewafadi. Vona mogitana, tomotoga matatabudi i tokemaiga Yaubada faifaina i wafa 'atamana fuedi 'waidie siwe dayagidi 'wa da vo i da iloilolo 'atamananina 'waineye."

Lei-subisubia Yaubada faifaina.

19 ¹Vavine tolagogona, kumanina 'asa'aiana 'atamana Babiloni, yana be'u a 'iseni i 'a'ava, mulieta tamu bona a nogai. Bonanina

a nogaiga 'wa da vo 'aila'a bwaikaotogina bonadi, i toke i vonavona abamega i vo,

Yaubada ta na subiai, taunina 'ada to'ita'ita'i, magemagetana wata toketokena.

²Yana veimea tonovidi wata 'atumaidi 'waidiega vavine toalagogona vematavuloga i veleni. I veleniga fai tomia fwayafwaya nuadi i 'ewadi bega i sakosakona, wata Yaubada yana tomotoga fuedi i luvewafadi.”

³Wata i toke i vona i vo,

Yaubada ta na subiai.

'Atamananina bwaikina lufwana i tovi-vagata kebu i na 'a'avaga.”

⁴To'edakumetavo 'au'auveadi 24 wata nani ma yawaidi toketokedi 4 ma yadi ve'ililibu i be'u, Yaubada yana 'eba miabui 'waineye i miamiaga i subiai i vo, Vona mogitana, yada nuanua bani'odi, ta na subiai.”

Yaubada yana Sifi Siaina yana nagi 'ana sakali.

⁵Wata tamu bona a nogai Yaubada yana 'eba miabui 'ai'aiwabuna 'wainega i vonavona i vo,

'Omi Yaubada yana tofолоvavo, tomotoga bwaikimi wata tomotoga-'avo'avovo, matatabumi 'wa veve'ililibuyeniga, yada Yaubada ta na subiai.”

⁶Wata a nogai 'aila'a bwaikaotogina bonadi, 'wa da vo kuvakuvala butu'aina 'alo tomuyoana i da duduya, i vonavona i vo,

Yaubada toketokena ta na subiai fai taunina 'ada Toveimea wata yada Kini.

⁷⁻⁸Ma yada sosoana yana toketokena ta na subisubiai fai yana Sifi Siaina yana nagi 'ana tutuya 'akonadi i souyeni, we'e vavinenina taiadi i na nagiga, taunina Iesu 'ana tovetumaganavo matatabudi, 'akonadi taunina i 'ivivigavya.

Yaubada kaleko 'atumaina wata 'avu'avuna i veleni, vunavunagina wata 'aninamanamalina, 'wainega taunina i 'ivivigavya.”

We'e kalekonina 'ana 'aseta Yaubada yana tomotoga yadi sauluva tonovidi.

⁹Anelose wata i voneku i vo, Side vonanina 'u na kilumi 'u na vo, Egavo Yaubada i tayegidiga yana Sifi Siaina yana nagi 'ana sakali 'waineye 'eba sosoana 'waidie. Vona de'e Yaubada yana vona, vona mogitana.” ¹⁰Yana vona a nogai nika ma yaku ve'ililibu a be'u mataneyeye siwe i voneku i vo, Kebu 'u na 'odu 'waikuye, 'ida 'ada 'ailuga wata emwavo yana vona tonovidi i nunuave'avinidi, matatabuda ta vetofolova Iesu faifaina. Yaubada 'aisena 'waineye 'u na 'odu'odu. Basenadi Yaubada

Y 19:2 Ve 6:10 z 19:3 Ve 14:11 a 19:4 Ve 4:9-11 b 19:6 Ve 11:15-18, 14:2-3

c 19:7 Ve 21:2,9; Efe 5:32; 19:8 Ais 61:10 d 19:9 Luk 14:15 e 19:10 Ve 22:8-9

yana Vona Tonovidi Iesu i sivemagesedi, we'e tutuya de'e 'Anu'anununa yana 'aivaita 'wainega yana tomotoga Vonanidi i lulu'ivoneyedi mali tomotoga 'waidie.”

'Aisaya osi 'avu'avuna 'ana tomotoga.

¹¹Anelose i vona'a'ava, mulieta abama 'ana saiboda i sibaleni. A 'isanago osi 'avu'avuna a 'iseni kwavuneye tamu tomotoga a 'iseni 'ana wagava, YANA SAULUVA TONOVIDI MA 'ANA VETUMAGANA. Yana veimea tonovidi 'waidiega i lulugavia wata i luluvematavuloga. ¹²^fMatana 'ai-'ala'alata bani'odi we'e 'unu'ununeye kunabanaba 'ai'aiwabudi fuei, toveimea bwaikidi 'adi vaigavu. Tamu 'ana wagava i kilumiga tomogoneye kebu tamu aitoi i da 'isa'inanaiga, taunina 'aisena i 'asetai. ¹³^g'Ana talauma i veageiga dayadayagina we'e wagava tamu 'ana 'eba 'ainana Yaubada yana Tokiavemageta. ¹⁴Tokiavemagetanina taunina Keliso, i kumeta we'e Yaubada yana tolugaviavo 'aila'a bwaikina abamega osi 'avu'avudi kwavudie i dodoga mulineye i deli, ma 'adi kaleko 'avu'avudi wata vunavunagidi. ¹⁵^hKelisonina 'awaneye kefata kainumu nigonigona, 'wainega tomia fwayafwaya 'aila'a tulina tulina i na nikedi. Yana veimea fa'alina 'wainega i na veveimeyedi, wata Yaubada Bwaikaotogina yana nuasako bwaikina 'wainega i na vematavulogidi. ¹⁶ⁱWe'e 'ana talauma 'waneye wata 'ageneye tamu wagava i kilumi i vo, KINI MATATABUDI 'AISENA YADI KINI, WATA TOVEIMEA BWAIKIDI 'AISENA 'ADI TOVEIMEA.

¹⁷Wata a 'isanago tamu anelose a 'iseni i tovtovoi inala 'waneye. I toke i vegole manuga matatabudi i yaveyavega 'waidie i vo, 'Wa va'auta Yaubada yana sakali bwaikina faifaina. ¹⁸Sakalinina 'waneye tomotoga fuei i wafaga tomogodi 'wa na 'anidi, kini, tolugaviavo ma yadi to'edakumetavo, osi wata 'adi tomotogavo, wata tomotoga 'ifwaidi, bwaikidi wata siadi, tofolova-maimaiga wata yavuyavudi.”

¹⁹^jI 'a'avana mulieta wata a 'isanago tomotoga sakoina 'aisaya kasikasisina bani'odi a 'iseni. Tomia fwayafwaya yadi toveimeavo bwaikidi i vonedi i va'auta yadi tolugaviavo taiadi, bega Keliso ma yana tolugaviavo taiadi i na vetalaga. ²⁰^kKeliso ma yana 'aila'avo i vetoketoke tomotoga kasikasisina wata yana tolu'ivona-vekavekali taiadi i 'ive'avinidi. Tolu'ivonanina kumanina 'eba nuavogana wata 'eba nua'ewa i 'idewadi tomotoga kasikasisina 'ana wagavayega, bega tomotoga fuei i vevekaliedi. Tomotoganidi i vekaliediga kumanidiavo tomotoga kasikasisina yana tugusa debadie wata 'ana kumaea 'waneye i 'odu'odu. I 'ive'avinidiga ma yawaidi i tawedi i obu muna bwaikina 'waneye.

^f 19:12 Ve 1:14 ^g 19:13 Ion 1:1,14 ^h 19:15 Ve 1:16 ⁱ 19:16 Ve 17:14 ^j 19:19 Same 2:2
^k 19:20 Ve 13:11-17, 20:10

²¹ 'We'e tomogonina osi kwavuneye i laka, 'awaneye kefata, yana kefatanina 'wainega 'ana gaviavo i luvewafadi, mulieta manuga fueidi i maia tomogodi i 'ani-wayogedi.

Yaubada Seitani i yogoni i na miamia malamala 1,000 nagedie.

20 ^{1m} Vetalaga i 'a'ava, mulieta tamu anelose a 'iseni abamega i obuobuma, nimaneye Vatu'ai Manamanawena 'ana 'eba yavu wata bulava kainumu i 'ive'avinidi. ²ⁿ I obuma wayo'o kasikasisina i 'ive'avini i yogoni bega malamala 1,000 nagedie yogoyogonina i na miamia. Wayo'onina kasikasisina kumanina 'o'olo tuatuaina, 'ana wagava Diabolo 'alo Seitani. ^{3I} 'ive'avini i 'a'avana i taweni i obu Vatu'aie i sibodeni bega kebu tamu aitoi 'ana fata i na yavuya, wata kebu tomia fwayafwaya i na vevekaliediga. Malamala 1,000 i na 'a'ava, Yaubada i na tauyeni i na souyeni tutuya 'ale'usana faifaina.

^{4o} Wata a 'isanago 'eba miabui 'ai'aiwabudi a 'isedi, 'eba miabuini 'waidie tomotoga ma yadi veimea Yaubada 'wainega, 'adi fata i na veveimea vematavuloga faifaina. Wata tomotoga 'ifwaidi 'anu'anunudi a 'isedi kumanidiavo basenadi i luvewafadi Iesu Valana 'Atumaina wata Yaubada yana Vona 'adi lu'ivona faifaidi. Wata tomotoganidi kebu i da 'odu'oduga tomotoga kasikasisina malavetayega 'ana kumaea 'alo taunina 'waidie, wata 'ana tugusa kebu i da 'ewai nimadie 'alo debadie. I wafa siwe i yawasa bega Keliso taiadi i na veveimea malamala 1,000 nagedie. ⁵ Yadi yawasa 'asa'aiana tovi-vaitugana kumekumetana, we'e towafa 'ifwaidi malamala 1,000 i na 'a'ava, mulieta i na tovoi-vaitugana. ^{6p} Egavo nagami i tovoiga Yaubada yana tomotoga magemagetadi, ma yadi sosoana taiadi i na miamia, bega tutuyanina tosakona i na luku 'ai-'ala'alase i na wafaotoga, tomotoganidi kebu tamu vita i na veluagai. Malamala 1,000 nagedie i na vevetofolova Yaubada wata Keliso faifaidi, 'asa'aiana yadi tovelomu, wata ma fueдие i na veveimea.

Yaubada i vetoketoke Seitani ma yana 'aila'avo i leodi.

⁷ Malamala 1,000 i na 'a'ava, mulieta Yaubada i na tauyeni Seitani i na 'etoyavuya yana 'eba yogona Vatu'ai Manamanawena 'wainega. ^{8I} na souyeniga i na nago 'awalawa 'aitamogana 'aitamogana 'waidie, tomotoga 'aila'a tulina tulina, kumanidiavo i goledi Gogi wata Megogi i na vevekaliedi. Seitani yana veimea 'wainega, tomotoganidi 'awalawa matatabuna 'waidiega i na va'augidi vetalaga faifaina, 'adi 'aila'a lu'iwawa-wayoga wala'ai 'ana 'ilukulukuta bani'odi. ⁹ Tomotoganidi fwayafwaya matatabuna 'waidie i na nagoi, Yaubada yana tomotoga wata

¹ 19:21 Ve 19:17-18 ^m 20:1 Ve 9:1 ⁿ 20:2-3 Ve 12:9; Iud 1:6 ^o 20:4 1 Kol 6:2; Ve 6:9, 13:16-17; Dan 7:27 ^p 20:6 Ve 2:11; 1 Fit 2:9

'atamananina i nuakalikalieniga i na tovifinedi. Nuanuadi i na leodi siwe 'ai-'ala'alata i na 'anita'ia abamega i na 'alaidi matatabudi i na wafa. ¹⁰ We'e Seitani, kumanina tomotoga i vekaliediga, Yaubada yana veimea 'wainega i na 'ive'avini i na taweni i na obu muna bwaikina 'waineye, basenadi tomotoga kasikasisina wata yana tolu'ivona-vekavekali, wata bei i tawedi. 'Ainina 'waineye i na veveviga lovana wata 'aiata kebu tamu sai'ifo i na 'a'ava, i na 'eno-vagata.

Vonayavuga 'ana 'eba ve'a'ava.

¹¹ Mulieta wata a 'isanago 'eba miabui 'ai'aiwabuna a 'iseni, bwaikina wata 'avu'avuna, 'ana tomotoga taiadi a 'isedi. Tomotoganina 'eba miabui 'waineye, bwaikaotogina wata magemagetana begaidi nani matatabuna abame wata fwayefwayeye i ve'aladegadega, i nagoi 'ani'ie siwe kebu tamu 'awasasa i da 'eno'eno bei i na giva tomotoganina 'wainega. ¹² Eba miabuina mataneyeye towafa fuedi i tovotovo, bwaikidi wata siaidi, bega buki 'ifwaidi i luyawagidi. Bukinidi nagedie towafanidi matatabudi yadi sauluva i lu'ivoneyedi bega Yaubada i na veimeyedi vematavuloga faifaina. We'e tamu buki i luyawagi, egavo 'adi wagava bei i kilumidiga, taunidi mia 'atumaina wata miamia-vagaina i na veluagai. ¹³ Egavo basenadi i wafaga malaveseye wata 'avale, wata towafa Vatu'ai Manamanawena 'waineye, matatabudi i souyedi i maia i vonayavuga yadi sauluva fwayefwayeye faifaidi. ¹⁴⁻¹⁵ Wafa wata towafa yadi 'eba mia Yaubada i tawedi muna bwaikina 'waineye matatabudi i 'a'ava. Egavo kebu 'adi wagava i da kilumidiga Yawai-vagata 'ana Buki 'waineye, Yaubada i veimea i na wafaotoga, i tawedi muna bwaikina 'waineye, wafa 'ana veluga i veluagai.

Abama wata fwayafwaya 'ivaudi.

21 ¹ Abama tuatuaina wata fwayafwaya tuatuaina eyaga taiadi i 'a'ava, mulieta a 'isanago abama wata fwayafwaya 'ivaudi a 'isedi. ² Wata Yaubada yana 'atamana magemagetana a 'iseni, taunina Ielusalema 'Ivauna i obuobuma abamega Yaubada 'wainega. 'Ana 'isa'isa 'atumaotogina 'wa da vo vavine i da 'ivivigavuya bega yana lamoga taiadi i na veluga nagi faifaina. ³ Bona a nogai 'eba miabui 'ai'aiwabuna 'wainega i toke i vonavona i vo, Tutuya de'e i na nagoga Yaubada i na miamia tomotoga taiadi. I na miave'itubama bega taunidi yana tomotoga. Yaubada taunina 'adi 'weabu wata yadi Yaubada.

¶ 20:10 Ve 19:20, 21:8; Mad 25:41 ¶ 20:12 Ve 20:5, 13:8; 2 Kol 5:10; Fol 17:31

§ 20:13 Lom 2:6; Ve 22:12 † 20:14 1 Kol 15:24-26,54-55; 20:15 Mad 25:41

u 21:1 2 Fit 3:13 v 21:2 Ibu 11:16; Ve 3:12

⁴W^wTaunina nuadi i na 'iveololodi nika kebu tamu tutuya i na 'we'welaga, wata bei kebu wafa, nuavita, 'alo veviga.

Naninidi sakoidi wata nani matatabudi fwayefwayeye nagami, i 'a'avaotoga.”

⁵Tomotoganina 'eba miabui 'ai'aiwabuna 'waineye i miamiaga i vona i vo, A na vonemu, nani matatabudi a 'i'ive'ivaudi.” Wata i vo, Ava'ai a vonevonemuga matatabuna 'u na kilumidi, fai vona mogitana wata vona tonovidi, tomotoga 'adi fata i na vetumagana vonanidi 'waidie.”

⁶Wata i voneku i vo, Yaku nuanua matatabuna 'akonadi a ve'a'avadi. Yau kumaniku lamukwaikwaituna wata kaluna, kebu 'aku 'eba velamuga wata kebu 'aku 'eba ve'a'avaga. Egavo nuanuadi bwaikina mia 'ivauna wata 'atumaina bani'odi 'anigodi i lala, i lubwainedi i na maia 'waikuye ufa-luluvuala nonogina a na veledi i na yemu. Ufanina 'wainega mia 'ivauna wata 'atumaina i na veluagai, 'waidie i na 'eno-vagata. ⁷Egavo i na vetoketokega faifaiku, naninidi 'atumaidi a na veledi, we'e yau yadi Yaubada wata taunidi natukwavo. ⁸We'e egavo kebu i da vetoketoke faifaiku, bani'odi fwa'ofwa'o'odi, vona'awaufaufa 'adi togeu, egavo i veve'avula-'avo'avovo, toluvwafa, egavo nuanuadi sakona-vebogi, tolu'af'o'a, tobalau, tobwalata, egavo i 'odu'odu yaubada-vekavekali 'waidie, wata tovekali matatabudi vita bwaikina i na veluagai. Vitanina i na tawedi muna bwaikina 'waineye, bei wafa 'ana veluga i na veluagai.”

'Atamana Ielusalema 'Ivauna.

⁹A^zanelose 7, kumanidiavo nani sakoidi yadi 'aivoeyega i 'iveiwagediga fwayefwayeye, 'waidiega tamu i mai i voneku i vo, 'U mai ta na nago Yaubada yana Sifi Siaina yana vavine a na vemu.” ¹⁰I vona'a'ava nika 'Anu'anunu 'Atumaina i ageku mogitana nika anelosenina i naweku tamu 'oya bwaikina tabwaneye. Bei Ielusalema 'Ivauna a 'iseni, 'atamananina magemagetana i obuobuma abamega Yaubada 'wainega. ¹¹'Atamananina i 'aninamanamali Yaubada yana mageta mataududulina 'wainega, 'ana 'isa'isa kileu 'atumaiotogina kilifou bani'odi, siwe 'ana tutula bwaikaotogina. ¹²'Ana kali kileu 'waidiega i 'idewai bababana wata i laka manamanawena, 'ana 'eba luku matatabuna 12, 'waidie anelose 12 i tovo^tovoi i 'i'isave'avinidi. Saiboda 'aitamogana 'aitamogana 'waidie wata wagava 'aitamogana 'aitamogana i kilumidi, wagavanidi me Isileli wauma 12 'adi wagava. ¹³Inala yana 'eba lakayega 'awa 'aitonu, wata yana 'eba inivayega 'aitonu, bolimanayega 'aitonu wata yavalatayega 'aitonu. ¹⁴Kalinina 'ana bawe'unu kileu bababadi 12, 'waidie bei Yaubada yana Sifi Siaina yana tomata'aulelevo 12 'ama wagava i kilumidi.

^w 21:4 Ve 7:17; 1 Kol 15:24-26 ^x 21:6 Ve 1:8, 22:13,17; Ais 55:1; Ion 7:37
^y 21:7 Lom 8:14-17 ^z 21:9-10 Ve 15:1, 21:2; Efe 5:27

¹⁵Anelosenina i vonaga 'waikuye ma yana 'eba 'etowava golida wautogana bani'odi, 'eba 'etowavanina 'wainega 'atamana wata 'ana kali, 'ana saiboda taiadi i na 'etowavadi. ¹⁶I 'etowavaiga, 'atamananina 'ana vemanawe, 'ana bababa, 'ana laka i vesala, me Guliki yadi 'etowava 12,000 sitedia. ^a ¹⁷Wata 'ana kali 'ana laka i 'etowavai me Diu yama 'etowavayega 144 kiubiti. ^b ¹⁸'Atamananina golida 'wainega i 'idewai, 'aninamanamalina kelasi bani'odi. 'Ana kali kileu 'atumaotogidi 'waidiega i 'idewai, bani'odi kilifou. ¹⁹⁻²⁰'Ana bawe'unu i 'ivivigavuya kileu 'adi tutula bwaikidi 'waidiega, kileunidi 'adi wagava side.

Bawe'unu nagami Diasifa 'wainega i 'ivivigavuya, 'ana 'isa'isa kilifou bani'odi.

'Ana veluga Safaia, 'ala'alawina tailikelike bani'odi,
 'ana vetonu Agate, 'ala'alawina mosomoso bani'odi,
 'ana ve-4 Emelodi, 'ala'alawina siwe sai'afo wayana.
 'Ana ve-5 Onikisi, yamoyamoina 'avu'avuna taiadi,
 'ana ve-6 Kaneliani, yamoyamoina,
 'ana ve-7 Kilisolaiti, 'ovu'ovuna,
 'ana ve-8 Beleli, 'ala'alawina malaveta bani'odi,
 'ana ve-9 Tofasi, 'ana 'ovu'ovu magemagetana,
 'ana ve-10 Kalisedoni, 'ana 'ala'alawa magemagetana,
 'ana ve-11 Tekoisi, bakabakana,
 'ana ve-12 Ametisi, bakabakana siwe sai'afo magemagetana.

²¹'Atamananina 'ana saiboda 12, saibodanidi 'aitamogana 'aitamogana 'waidie bida 'aitamogana 'aitamogana i yatodi, bidanidi 'aninamanamalidi wata 'adi tutula bwaikidi. 'Atamananina 'ana 'eda i 'idewai golida 'wainega, 'ana 'isa'isa 'atumaotogina kelasi bani'odi.

²²'Atamananina nageneye vanuga 'eba velu'ui kebu a da 'iseniga, fai 'Auvea Yaubada toketokeotogina wata yana Sifi Siaina 'asa'aiana taunidi tomotoga yadi vanuga 'eba velu'ui. ²³^cYaubada magetana 'atamananina i 'i'ivemagetai wata yana Sifi Siaina taunina 'asa'aiana 'atamananina 'ana mageta, bega inala kebu wata weta'i kebu. ²⁴Magetanina, wata tomia fwayafwaya matatabudi yadi mageta, 'waineye i na miamia wata yadi toveimeavo bwaikidi yadi 'ai'aiwabu i na mimaiedi 'atamananina 'waineye. ²⁵Tutuya matatabuna 'awa i sibala-vagasedi, kebu tamu tutuya i na sibodadi fai 'aiata luvedavedamanina. ²⁶Tomotoga 'aila'a tulina tulina ma yadi ve'ililibu yadi 'ai'aiwabu i na mimaiedi 'atamananina 'waineye. ²⁷^dKebu tamu sai'afo ava'ai sakoina i na luku 'atamananina 'waineye, sauluva 'eba bunumayaga 'adi to'idewadewa wata tovekali kebu 'adi fata i na luku. Tomotoganidi 'adi wagava i kilumidiga Sifi Siaina

^a 21:16 'Ana vemanawe 2,800 kilomita bani'odi. ^b 21:17 'Ana vemanawe 64 mita bani'odi. ^c 21:23 Ais 60:19-20; Ve 22:5 ^d 21:27 1 Kol 6:9-10; Ve 3:5, 13:8

yana buki nageneye bega yawai-vagata i veluagai, kumanidiavo 'aisedi 'adi fata i na luku Yaubada yana 'atamananina 'waineye.

Tamu ufa mia 'atumaina wata miamia-vagaina faifaina.

22 ¹⁻² ^eWata anelose tamu ufa i veku, matana lumasi'ataotogina i sousouyeni Yaubada wata yana Sifi Siaina yadi 'eba miabui 'ai'aiwabuna 'wainega. Ufanina 'wainega tomotoga mia 'atumaina wata miamia-vagaina i veveluagai, i sousouyeni 'atamana 'ana 'eda kamwaneamo i ivoivo. Ufanina dolena ma vi'ainana Welavi Yawai i veve'alatovoi, weta'i 'aitamogana 'aitamogana i vuuvuaga, malamala 'aitamogana 'aitamogana nagedie. Egavo vuagidi i na 'anidiga mia 'atumaina wata miamia-vagaina i na veluagai, we'e lukudi tomotoga 'adi 'aila'a tulina tulina yadi mulamula, 'adi 'eba 'ive'atamai faifaina. ³ ^fKebu tamu nani Yaubada i da 'alatabutabuya 'atamananina nageneye.

'Atamananina nageneye Yaubada wata yana Sifi Siaina yadi 'eba miabui 'ai'aiwabuna 'waineye i miabui i miamia, we'e yana tofolovavo ma yadi subia i na 'odu'odu 'waineye. ⁴ ^gDebadie Yaubada 'ana wagava i kilumidi, wata maigina i na 'ise'iseni. ⁵ ^hAuvea Yaubada taunina yadi mageta nonogina, bega lovana kebu, wata inala yana mageta 'alo dukala faifaiddi kebu i na nuanua. Tomotoganidi 'atamananina nageneye Yaubada taiadi i na veveimea-vagata.

Iesu yana mai faifaina.

⁶ Wata anelose i voneku i vo, Vonanidi 'akonadi 'u kilumidiga vona mogitana i na souyedi. 'Amu fata 'u na vetumagana 'waidie. Basenadi 'Auvea Yaubada 'Anu'anununa yana tolu'ivonavo i agedi bega yana vona i lulu'ivoneyedi. Wata bani'odi 'asiau yana anelose i vetunei abamega bega naninidi sai'afoga i na souyediga i sivemagesedi yana tofolovavo 'waidie.”

⁷ ⁱWe'e Iesu i vonavona i vo, A na vonemi. Yau sai'afoga a na wai. Vonanidi a voneyediga buki de'e nageneye a vona-vagata 'awaie i na souyedi, begaidi egavo i na lu'iwawadi i na vematayakeyakedi 'eba sosoana 'waidie.”

⁸ We'e yau Ioni naninidi matatabuna a 'isedi wata a nogaidi, i 'a'avana ma yaku ve'ililibu a be'u a lumata'afufu anelose 'ageneye, kumanina naninidi matatabuna i veku, igodi a da subiai. ⁹ Siwe i talabodeku i vo, Kebu 'u na 'odu 'waikuye. 'Ida 'ada 'ailuga, emwavo Yaubada yana tolu'ivonavo, wata tomotoganidi buki de'e yana vona i vevematayakeyakediga, matatabuda Yaubada yana tofolovavo. Yaubada 'aisena 'waineye 'u na 'odu'odu.”

^e 22:1-2 Nag 2:9 ^f 22:3 Ve 7:15 ^g 22:4 Mad 5:8; Ve 14:1 ^h 22:5 Ve 21:23,25
ⁱ 22:7 Ve 1:3

¹⁰Wata i voneku i vo, Vonanidi faifaidi Yaubada i vona-vagata de'e buki nagenega kebu 'u na givediga. Naninidi sai'afoga i na souyedi bega 'u na lulu'ivona. ¹¹Fai Iesu i na souye-matayo'oyeni egavo 'asiau i vevekali, tutuyanina 'waineye wata i na vevekali. Egavo 'asiau i sakosakona, tutuyanina 'waineye wata i na sakosakona. We'e egavo 'asiau yadi sauluva 'atumaidi, tutuyanina 'waineye wata i na vevesauluva 'atumaidi. Egavo 'asiau yadi sauluva magemagetadi, tutuyanina 'waineye yadi sauluva magemagetadi Yaubada mataneye.”

¹²JWata Iesu i vo, A na vonemi, sai'afoga a na wai. Tutula a na viwedi, tomotoga 'aitamogana 'aitamogana 'adi tutula a na veledi yadi folova 'adi 'isa'isa bani'odi. ¹³KYau kumaniku lamukwaikwaituna wata kaluna, kebu 'aku 'eba velamuga wata kebu 'aku 'eba ve'a'avaga.

¹⁴Egavo Iesu yana wafa 'wainega i ve'atumaiotoga, 'wa da vo 'adi kaleko i da lekolekoadi dayaginega, 'eba sosoana 'waidie bega 'adi fata i na luku Yaubada yana 'atamana 'waineye, wata Yaubada i tauyedi 'adi fata Welavi Yawai vuagina i na 'ania. ¹⁵MWe'e 'atamananina tanotanoge tosakona fuedi, bani'odi tobalau, tolu'afo'a, tobwalata, tove'avula-avo'avovo, toluvewafa, egavo i 'odu'odu yaubada-vekavekali 'waidie, wata tomotoga 'ifwaidi i vevekaliga yadi sauluvayega 'alo yadi vonayega.

¹⁶NYau Iesu yaku anelose a vetunei naninidi i lu'ivoneyedi 'omi tovetumaganavo 'waimie 'wa miamiani 'awalawa tulina tulina 'waidie. We'e yau Kini Devida 'ana wauma 'wainega a tubuga wata yau Kumauloku magemagetaku.”

¹⁷OAnu'anunu 'Atumaina wata Yaubada yana Sifi Siaina yana vavine i vonavona i vo, 'Wa maia.” Vonanina de'e egavo i na nogaiga i lubwainedi wata i na vo, 'Wa maia.”

Egavo nuanuadi bwaikina mia 'ivauna wata 'atumaina bani'odi 'anigodi i lala, i lubwainedi i na maia ufa nonogina i na yemu, ufanina 'wainega mia 'atumaina wata miamia-vagaina i na veluagai.”

Ioni yana vona 'eba ve'a'ava.

¹⁸PYau Ioni a na vonemi. De'e vonanidi 'akonadi a lu'ivoneyediga Yaubada yana Vona i vona-vagata ava'ai sai'afoga i na souyedi faifaidi. Begaidi a velu'ase'ase, 'ai'edi aitoi yana nuanuayega vonanidi i na 'imoso'iedi, wata Yaubada 'ana vematavuloga i na 'imoso'iedi viganidi sakoidi a lu'ivoneyediga de'e buki nageneye, 'waidiega. ¹⁹QWata bani'odi 'ai'edi aitoi Yaubada yana Vona 'ifwaidi de'e bukinina nageneye i na ve'o'oleniga, wata 'ana 'anivelena Welavi Yawai vuagina Yaubada i na

j 22:12 2 Kol 5:10 k 22:13 Ve 1:8, 21:6 l 22:14 Ve 22:1-2 m 22:15 Ve 21:27
n 22:16 Lom 1:3-4; Ve 1:1 o 22:17 Ve 21:6; Ais 55:1 p 22:18 Ve 4:2; Ve 15:1
q 22:19 Ve 22:2

ve'o'oleni, we'e yana 'eba mia 'atamananina magemagetana a voneyeniga de'e buki nageneye wata i na ve'o'oleni.

²⁰ʔYaku vona de'e buki nageneye Iesu i ve'awamogitanedi i vo, 'Asa'aiana bani'odi mogitana. Sai'afoga a na wai.”

Toveimea Iesu, 'u mimaiga 'ima wata yama nuanua.

²¹Nuanuaku 'ada Toveimea Iesu ma yana nuakalikali i na vevesauluva 'atumaina 'omi Yaubada yana tomotoga matatabumi 'waimie.

'Asa'aiana bani'odi,

Yau Ioni.